

MESYUARAT KETIGA, PENGGAL KEDUA  
PARLIMEN KEEMPAT BELAS  
2019

**HARI SELASA : 19 NOVEMBER 2019**

**PEMBERITAHUAN PERTANYAAN BAGI JAWAPAN LISAN**  
**MESYUARAT KETIGA, PENGGAL KEDUA**  
**PARLIMEN KEEMPAT BELAS**  
**MAJLIS MESYUARAT DEWAN RAKYAT**

**PERTANYAAN : PERTANYAAN-PERTANYAAN JAWAB LISAN**

**DARIPADA : TUAN CHANG LIH KANG [ TANJONG MALIM ]**

**TARIKH : 19 NOVEMBER 2019**

**SOALAN**

**TUAN CHANG LIH KANG [ TANJONG MALIM ]** minta **MENTERI INDUSTRI UTAMA** menyatakan jumlah wang yang telah dibelanja untuk menampung Insentif Pengeluaran Getah (IPG) pada tahun 2019. Berapa orang penoreh getah yang telah menikmati bantuan tersebut.

**JAWAPAN**

Tuan Yang Di-Pertua,

Pada tahun 2019, sebanyak RM 60,453,289 telah dibelanjakan untuk menampung Insentif Pengeluaran Getah (IPG) dan insentif ini telah dinikmati oleh 90,208 pekebun kecil di seluruh negara.

**Pembayaran Terkumpul IPG Dari September 2015 Hingga Ogos 2019**

NEGERI	BIL TUNTUTAN	BERAT KERING (KG)	JUMLAH PEMBAYARAN (RM)
Perak	54,557	14,714,322	7,087,306

Sekian terima kasih.

**PEMBERITAHUAN PERTANYAAN LISAN DEWAN RAKYAT**  
**MESYUARAT KETIGA PENGGAL KEDUA,**  
**PARLIMEN KEEMPAT BELAS**

---

**PERTANYAAN : LISAN**

**DARIPADA : YB DATUK SERI DR. ADHAM BIN BABA**  
**[ TENGGERA ]**

**TARIKH : 19 NOVEMBER 2019**

**SOALAN**

Minta **MENTERI SUMBER MANUSIA** menyatakan apakah langkah-langkah penguatkuasaan terhadap para peminjam pinjaman latihan kemahiran di bawah Perbadanan Tabung Pembangunan Kemahiran (PTPK) dan adakah program ini masih diteruskan untuk melahirkan tenaga mahir di negara ini.

**JAWAPAN**

Tuan Yang di-Pertua,

1. Untuk makluman Dewan Yang Mulia ini, Perbadanan Tabung Pembangunan Kemahiran (PTPK) telah melaksanakan tindakan penguatkuasaan ke atas peminjam yang ingkar membayar balik pinjaman sejak tahun 2010.
2. Sehingga 30 September 2019, sebanyak 27,612 *Letter of Demand* (LOD) dan 10,753 tindakan Saman telah dikeluarkan kepada peminjam dan penjamin yang ingkar membuat bayaran balik Pinjaman Latihan Kemahiran. Daripada tindakan tersebut, sebanyak RM27.88 juta kutipan bayaran balik berjaya dikutip. Tindakan penguatkuasaan ini akan terus dilaksanakan pada masa hadapan.
3. Kesimpulannya, bayaran balik Pinjaman Latihan Kemahiran ini merupakan elemen penting dan ianya adalah salah satu fungsi Perbadanan bagi meneruskan hasrat Kerajaan untuk memberikan Pinjaman Latihan Kemahiran secara berterusan kepada pelatih yang layak bagi meningkatkan bilangan tenaga kerja mahir negara pada masa hadapan.

**PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KEDUA,  
PARLIMEN KEEMPAT BELAS**

---

**PERTANYAAN : JAWAB LISAN**

**DARIPADA : YB DATO' HAJI MOHD FASIAH BIN MOHD  
FAKEH**

**[SABAK BERNAM]**

**TARIKH : 19 NOVEMBER 2019 (SELASA)**

**SOALAN**

Minta **MENTERI BELIA DAN SUKAN** menyatakan adakah Kementerian bercadang untuk memperbaiki dan menyenggara gelanggang futsal, sepak takraw, bola jaring dan pusat sukan yang sedia ada di daerah-daerah termasuk di Parlimen Sabak Bernam bagi kemudahan belia-belie untuk menyertai aktiviti sukan dan riadah bagi melahirkan belia sihat dan komuniti yang bersatu padu.

**JAWAPAN**

Yang di-Pertua,

1. Kementerian Belia dan Sukan telah dan akan menyelenggara serta menaik taraf kemudahan-kemudahan infrastruktur sukan secara berperingkat termasuklah di Parlimen Sabak Bernam. Untuk makluman Yang Berhormat, di Sabak Bernam terdapat 29 infrastruktur sukan. Daripada 29 infrastruktur tersebut, 20 infrastruktur berada dalam keadaan yang baik, manakala sembilan (9) perlu diselenggara dan dibaik pulih secepat mungkin. Kementerian Belia dan Sukan akan bekerjasama dengan kerajaan negeri untuk memastikan bahawa senarai keutamaan penambahbaikan dilaksanakan sebaik mungkin.

2. Dalam 29 infrastruktur sukan tersebut, 20 daripadanya adalah di bawah bidang kuasa kerajaan negeri, manakala baki sembilan (9) infrastruktur adalah di bawah seliaan KBS. Infrastruktur akan dibaik pulih secepat mungkin, juga tertakluk kepada permohonan serta kerjasama dengan kerajaan negeri. Keutamaan pembaikpulihan infra sukan pada tahun hadapan akan difokuskan bagi kawasan luar bandar dan juga kawasan bandar yang mempunyai kawasan belia berisiko yang paling tinggi.

Sekian, terima kasih.

**PEMBERITAHUAN PERTANYAAN BAGI JAWAPAN LISAN**  
**MESYUARAT KETIGA, PENGGAL KEDUA**  
**PARLIMEN KEEMPAT BELAS**  
**MAJLIS MESYUARAT DEWAN RAKYAT**

**PERTANYAAN : LISAN**

**DARIPADA : TUAN CHE ALIAS BIN HAMID**

**TARIKH : 19 NOV 2019 (SELASA)**

**SOALAN**

**TUAN CHE ALIAS BIN HAMID [ KEMAMAN ]** minta **MENTERI INDUSTRI UTAMA** menyatakan **pendekatan** yang lebih progresif dilakukan bagi **mengembalikan semula kegemilangan industri koko** yang kini berhadapan dengan masalah kekurangan pengeluaran biji koko.

**JAWAPAN**

Tuan Yang Di-Pertua,

Untuk makluman Ahli Yang Berhormat, perkembangan industri koko pada ketika ini adalah tertumpu kepada industri pengisaran biji koko dan sektor huluan khususnya dalam menghasilkan '*single origin*' koko.

Bagi memastikan sektor huluan terus kekal berdaya saing, beberapa pendekatan telah dirangka dan sedang dilaksanakan melalui pelaksanaan program-program pembangunan seperti berikut:-

(i) melaksanakan Program Peningkatan Produktiviti dengan memberikan insentif input pertanian seperti baja dan racun serta khidmat nasihat dan kursus pemindahan teknologi untuk menggalakkan pekebun untuk terus menyelenggara dan melibatkan diri dalam penanaman koko dengan mengamalkan Amalan Pertanian Baik (GAP) bagi meningkatkan

#### SOALAN NO : 4

produktiviti pengeluaran biji koko kering yang berkualiti di kalangan peserta program;

(ii) melaksanakan Program Pembangunan Kluster Koko untuk menambah nilai rantai pengeluaran koko seterusnya meningkat pendapatan pekebun koko. Program ini merupakan program di bawah RMKe-11 berkonsepkan *Farm To Table*, di mana segala aktiviti berasaskan koko dilaksanakan di tapak kluster koko bermula daripada peringkat nurseri koko hinggalah kepada penghasilan produk akhir iaitu coklat yang melibatkan pekebun koko dan komuniti sekitar kluster koko; dan

(iii) menjalankan projek-projek penyelidikan dan pembangunan (R&D) bagi menambah daya saing komoditi koko melalui pembangunan bahan tanaman dan penggunaan klon-klon koko berhasil tinggi serta tahan perosak dan penyakit, peningkatan produktiviti melalui pembangunan teknologi pengeluaran koko, pengurusan penyakit dan perosak serta penggunaan bioteknologi dalam meningkatkan pengeluaran bahan tanaman koko berkualiti.

Sekian, terima kasih.



**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : PUAN MARIA CHIN BINTI ABDULLAH  
[ PETALING JAYA ]**

**TARIKH : 19 NOVEMBER 2019 (SELASA)**

**SOALAN NO. 5**

Minta **MENTERI HAL EHWAL EKONOMI** menyatakan apakah yang telah dilakukan bawah item “00104 Penyusunan Semula Masyarakat” dalam Belanjawan 2019 yang dianggarkan telah memakan belanja sejumlah RM 300,000,000.

**JAWAPAN**

Tuan Yang di-Pertua,

1. Untuk makluman Ahli Yang Berhormat, di bawah butiran 00104 Program Penyusunan Semula Masyarakat dalam Belanjawan 2019, Kerajaan telah melaksanakan dua program, iaitu:

- i) Program Dana Pelaburan Hartanah oleh Pelaburan Hartanah Berhad (PHB); dan
- ii) Program Dana Ekuiti Nasional Berhad oleh Ekuiti Nasional Berhad (EKUINAS).

2. Program Dana Pelaburan Hartanah di bawah PHB ini adalah bagi meningkatkan pegangan Bumiputera dalam sektor hartanah komersial terutama di lokasi strategik di bandar-bandar utama melalui suntikan

pelaburan dalam dana Amanah Hartanah Bumiputera (AHB). Di bawah program ini, PHB membuat pembelian bangunan komersial yang telah dibangunkan serta melaksanakan pembangunan hartanah komersial. Sehingga tahun 2019, saiz dana AHB adalah sebanyak RM4.0 bilion.

3. Bagi pencapaian PHB sehingga tahun 2019, secara keseluruhan PHB telah memiliki sebanyak 22 bangunan yang telah dibeli serta dibangunkan dengan nilai keseluruhan hartanah berjumlah RM6.06 bilion iaitu terdiri daripada bangunan pejabat sebanyak 63%, kompleks beli belah sebanyak 31%, hospital sebanyak 4% dan premis perniagaan sebanyak 2%.

4. Manakala, Program Dana Ekuiti Nasional Berhad di bawah EKUINAS adalah untuk meningkatkan pegangan ekuiti Bumiputera melalui model ekuiti persendirian (PE) bagi mengembangkan syarikat yang mempunyai pertumbuhan dan pulangan pelaburan yang tinggi. Selain itu, EKUINAS juga berperanan untuk meningkatkan penglibatan Bumiputera di peringkat pengurusan dalam syarikat yang dilabur, penciptaan peluang pekerjaan baharu dan profesional kepada Bumiputera serta penciptaan nilai dalam rantai bekalan.

5. Semenjak penubuhannya pada tahun 2009, EKUINAS telah memperolehi RM2.7 bilion hasil daripada realisasi (penjualan) pelaburan syarikat-syarikat yang berjaya dikembangkan. Perbelanjaan pelaburan oleh EKUINAS pada tahun 2019 adalah sebanyak RM22.9 juta. EKUINAS juga telah memperuntukkan sebanyak RM1.5 bilion untuk *Tranche 4* bagi kegunaan pelaburan baharu.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KEDUA  
PARLIMEN KEEMPAT BELAS**

**PERTANYAAN : LISAN**

**DARIPADA : DATO' SRI HAJI FADILLAH BIN YUSOF  
[ PETRAJAYA ]**

**TARIKH : 19 NOVEMBER 2019 (SELASA)**

**SOALAN**

Minta **MENTERI PENGANGKUTAN** menyatakan adakah kepentingan rakyat Sabah dan Sarawak dititik beratkan dalam usaha kerajaan melaksanakan pelan rasionalisasi Malaysia Airlines Berhad kerana pengangkutan udara sangat penting kepada penduduk kedua wilayah ini.

**JAWAPAN**

Yang Dipertua,

1. Untuk makluman Yang Berhormat, isu berhubung pelan rasionalisasi Malaysia Airlines Berhad (MAB) adalah di bawah seliaan Kementerian Hal Ehwal Ekonomi. Kementerian Pengangkutan dimaklumkan bahawa Kerajaan telah melaksanakan pelbagai inisiatif penstrukturan semula Malaysia Airlines termasuk Pelan Pemulihan MAS (PPM) 2014 – 2019 untuk memulihkan kedudukan dan prestasi kewangan dan operasi. Sepanjang tempoh tersebut, MAS menghadapi pelbagai cabaran termasuk pertumbuhan penumpang yang menyederhana dan diganggu oleh perang harga serta amalan pesaing industri yang mencipta lebihan penawaran dengan izin, *over supply*. Cabaran lain termasuklah ketidakstabilan harga minyak dan ketidaktentuan dalam tukaran wang asing.
2. Kementerian Pengangkutan ingin memperjelaskan bahawa sebarang pelan rasionalisasi yang telah dan akan dilaksanakan oleh MAB tidak akan menjejaskan Perkhidmatan Udara Luar Bandar (*Rural Air Services – RAS*) sedia ada yang disediakan oleh MASwings.
3. Untuk makluman Yang Berhormat, RAS merupakan perkhidmatan udara yang tidak ekonomik yang dijalankan di kawasan pedalaman Sabah dan Sarawak di mana pengangkutan udara merupakan mod pengangkutan utama yang menghubungkan penduduk di kawasan luar bandar dengan dunia luar. Dalam hubungan ini, Kerajaan akan terus komited dalam meneruskan perkhidmatan RAS yang disediakan oleh MASwings bagi kemudahan penduduk di kawasan pedalaman Sabah dan Sarawak dengan menyediakan peruntukan subsidi yang secukupnya.
4. Bagi maksud tersebut, pada 3 Januari 2019, Kerajaan Malaysia telah menandatangani satu perjanjian baharu dengan syarikat penerbangan MASwings bagi meneruskan penyediaan perkhidmatan RAS di Sabah dan Sarawak untuk tempoh 6 tahun yang akan datang iaitu bermula 2019 hingga 2024 selaras dengan kajian semula oleh Suruhanjaya Penerbangan Malaysia (*Malaysian Aviation Commission – MAVCOM*). Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN NIK NAZMI BIN NIK AHMAD [SETIAWANGSA]**

**TARIKH : 19 NOVEMBER 2019 (SELASA)**

**SOALAN**

**YB TUAN NIK NAZMI BIN NIK AHMAD [ SETIAWANGSA ]** minta **MENTERI WILAYAH PERSEKUTUAN** menyatakan apakah Jabatan Perancangan Bandar dan Desa bercadang mengemas kini Garis Panduan Perancangan Perumahan yang diperkenalkan pada 2016.

**JAWAPAN**

Tuan Yang di-Pertua,

Untuk makluman Ahli Yang Berhormat, Garis Panduan Perancangan (GPP) Perumahan diterbitkan oleh PLANMalaysia (Jabatan Perancangan Bandar dan Desa) pada tahun 2016. GPP ini telah diluluskan oleh Jemaah Menteri pada 13 Jun 2014 dan Majlis Negara bagi Kerajaan Tempatan pada 18 September 2014.

GPP Perumahan ini disediakan bertujuan untuk membantu Pihak berkuasa Negeri (PBN), Pihak Berkuasa tempatan (PBT) dan agensi teknikal di dalam **merancang** dan mengawal pembangunan semua jenis perumahan semasa penyediaan rancangan pemajuan (rancangan struktur, rancangan tempatan, rancangan kawasan khas) dan memproses permohonan kebenaran merancang. Penyediaan GPP Perumahan ini juga bertujuan untuk memandu dan memudah cara pemaju di dalam **mereka bentuk susun atur dan menyediakan kemudahan awam dan infrastruktur bagi pemajuan yang dibangunkan.**

Kandungan GPP Perumahan ini lebih menfokuskan kepada perancangan fizikal yang merangkumi aspek kerangka dan konsep pembangunan perumahan, kawalan kelulusan, perancangan tapak, keluasan, kemudahan masyarakat dan tanah lapang dan rekreasi, tempat letak kereta, hierarki dan piawaian jalan raya, piawaian terperinci bagi pembangunan perumahan bertanah dan piawaian terperinci bagi pembangunan perumahan berbilang tingkat meliputi saiz tanah dan luas lantai, jalan dan lorong, anjakan, ketinggian bangunan dan keperluan lain.

Manakala **Dasar Perumahan Negara (DRN) Tahun 2018-2025** dan Dasar Perumahan Mampu Milik Negara telah disediakan oleh **Jabatan Perumahan Negara** di bawah **Kementerian Perumahan dan Kerajaan Tempatan (KPKT)**. **DRN 2018-2025 ini** telah dilancarkan pada 28 Januari 2019 dan Dasar Perumahan Mampu Milik Negara telah dilancarkan pada 11 Mei 2019. Tujuan DRN 2018-2025 disediakan adalah untuk **memandu arah sektor perumahan negara** dengan **menekankan perancangan, pembangunan dan pengurusan perumahan** yang sistematik dan cekap bagi menjana habitat yang mampan, berdaya huni, berkualiti dan inklusif yang **mampu dimiliki oleh rakyat** dengan mencakupi bidang perancangan, pembangunan dan pengurusan perumahan. Sebanyak 5 fokus, 16 pernyataan strategi dan 57 pelan tindakan digubal dalam DRN 2018-2025.

Tuan Yang di-Pertua dan Ahli-ahli Yang Berhormat,

PLANMalaysia sentiasa mengambil perhatian terhadap isu-isu berkaitan perancangan perumahan seperti jumlah keluasan perumahan mampu milik yang sesuai dengan kawasan perbandaran utama seperti Rumah Harapan, Kementerian Wilayah Persekutuan (KWP) dan perancangan *micro-housing* yang lebih ekonomik dan praktikal. GPP Perumahan seterusnya akan dikemaskini dan diselaraskan dari semasa ke semasa untuk menangani isu berkaitan perancangan perumahan serta keperluan mampu milik B40 dan M40 selaras dengan halatuju Dasar Perumahan Negara 2018-2025 dan Dasar Perumahan Mampu Milik Negara yang disediakan oleh Kementerian Perumahan dan Kerajaan Tempatan (KPKT).

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATO' HAJI MOHD SALIM SHARIF  
[ JEMPOL ]**

**TARIKH : 19 NOVEMBER 2019 [ SELASA ]**

**SOALAN**

Minta **MENTERI HAL EHWAL EKONOMI** menyatakan perkembangan semasa berkenaan projek rintis cantuman tanah peneroka FELDA untuk dijadikan ladang besar dan implikasi terhadap peneroka yang terlibat.

**JAWAPAN**

Tuan Yang di-Pertua,

Saya mohon untuk menjawab bersekali soalan Yang Berhormat Jelebu pada 28 November 2019 kerana menyentuh isu yang sama.

1. Untuk makluman Ahli Yang Berhormat, FELDA telah melakukan langkah awal bagi pelaksanaan projek ini dengan membuat perbincangan berkaitan urusan tanah bersama Pejabat Tanah dan Daerah serta Pejabat Tanah dan Galian Negeri pada Mei dan Jun 2019.

2. FELDA juga telah menjalankan sesi libat urus untuk menerangkan konsep pelaksanaan model baharu FELDA di semua 11 wilayah FELDA bermula pada 20 Ogos hingga 24 September 2019. Sesi libat urus ini melibatkan kepimpinan rancangan merangkumi Pengurus Rancangan,

Ketua Peneroka Rancangan, Pengerusi Gabungan Peneroka Wanita (GPW), Pengerusi NGO Kami Anak FELDA (KAF) dan Majlis Belia FELDA Malaysia (MBFM) serta Ketua-ketua Blok bagi gugusan atau rancangan. Ia merangkumi sesi soal jawab secara terbuka berkaitan konsep pelaksanaan model baharu.

3. FELDA Bukit Rokan telah dipilih sebagai projek rintis model baharu FELDA kerana rancangan ini termasuk dalam program tanam semula dengan pendapatan terendah di antara rancangan yang terlibat dalam program tanam semula 2019. Melalui bancian ke atas peneroka FELDA berkenaan, seramai 150 orang daripada 171 jumlah peneroka atau 87% telah bersetuju untuk menyertai program yang akan dijalankan.

4. Antara konsep bagi pelaksanaan program ini, peneroka akan menerima pendapatan bulanan atau bayaran manfaat yang tetap dan perkongsian keuntungan daripada hasil ladang. Bagi bayaran manfaat bulanan yang bakal diterima oleh peneroka terlibat, ia adalah berdasarkan beberapa faktor yang mempengaruhi penghasilan di rancangan terpilih. Ini termasuklah kesesuaian tanah, bentuk muka bumi dan iklim setempat. Jumlah sebenar pembayaran manfaat bulanan tersebut masih diperhalusi untuk memastikan peneroka mendapat bayaran yang sewajarnya.

5. Program penggabungan tanah peneroka dapat memberi implikasi positif ke arah peningkatan produktiviti melalui ekonomi bidangan dan pengurusan ladang yang cekap dan efektif. Pada masa yang sama, peneroka tidak akan kehilangan hak milik tanah kerana FELDA hanya mengurus ladang sahaja. Melalui program ini, peneroka tidak perlu memikirkan tanggungan bebanan hutang tanam semula seperti pinjaman sara hidup, pendahuluan hasil dan kos pembangunan ladang.

Sekian, terima kasih.



**PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KEDUA  
PARLIMEN KE-EMPAT BELAS**

**PERTANYAAN : LISAN**

**DARIPADA : DATUK ZAKARIA BIN MOHD EDRIS @ TUBAU  
[LIBARAN]**

**TARIKH : 19 NOVEMBER 2019 (SELASA)**

**SOALAN**

Minta **MENTERI PENGANGKUTAN** menyatakan apakah hasil siasatan Pasukan Khas Kementerian tentang gangguan sistem di KLIA Ogos yang lalu dan kaedah mengatasinya memandangkan insiden ini membabitkan pintu masuk negara.

**JAWAPAN**

Yang di-Pertua,

1. Untuk makluman Ahli Yang Berhormat, pada 21 hingga 30 Ogos 2019, infrastruktur rangkaian lapangan terbang (*Airport Network Infrastructure*) di Lapangan Terbang Antarabangsa Kuala Lumpur (KLIA) telah gagal berfungsi dengan baik. Kegagalan ini telah melumpuhkan sistem *Total Airport Management System* (TAMS) di KLIA yang menjejaskan operasi utama lapangan terbang. TAMS merupakan sistem pengurusan lapangan terbang bersepadu yang diintegrasikan dengan majoriti komponen sistem maklumat berelektronik di lapangan terbang yang dihubungkan melalui kabel optik fiber berkelajuan tinggi.
2. Insiden kegagalan TAMS di KLIA telah menyebabkan gangguan kepada beberapa komponen sistem maklumat berelektronik seperti Sistem Pengendalian Bagasi (BHS), Sistem Paparan Maklumat

Penerbangan (FIDS), Sistem Imigresen, dan Sistem Pengurusan Bangunan (BMS). Ini menyebabkan berlakunya pembatalan dan kelewatan penerbangan, kelewatan penerimaan dan penghantaran bagasi serta kesesakan.

3. Susulan insiden tersebut, Kementerian Pengangkutan pada 28 Ogos 2019 telah menubuhkan Jawatankuasa Peringkat Kementerian Bagi Menyasat Isu Kegagalan *Total Airport Management Systems* secara pentadbiran. Tujuan utama penyiasatan dilaksanakan adalah untuk menentukan hal keadaan dan punca sebenar kegagalan rangkaian TAMS di KLIA bagi mengelakkan insiden yang sama berlaku pada masa hadapan. Penyiasatan yang dijalankan tidak bertujuan untuk membuktikan kesalahan atau liabiliti kepada mana-mana pihak.

4. Hasil siasatan yang dijalankan, kegagalan rangkaian TAMS adalah disebabkan oleh kegagalan Rangkaian Suis Teras (*Core Network Switches*) untuk berfungsi dan ketidakupayaan untuk memisahkan rangkaian suis teras tersebut. Suis teras tersebut telah pun beroperasi semenjak KLIA beroperasi pada tahun 1998 lagi dan tidak diganti. Suis teras adalah merupakan suis yang menghubungkan kesemua rangkaian sistem di KLIA.

5. Hasil siasatan yang dijalankan juga mendapati bahawa tiada sebarang bukti yang menunjukkan terdapat sebarang serangan siber samada dari dalaman atau luaran yang boleh mengaitkan kegagalan rangkaian TAMS. Selain itu, Polis DiRaja Malaysia juga sedang menjalankan siasatan jenayah bagi mengenalpasti jika terdapat sebarang unsur khianat atau sabotaj.

6. Jawatankuasa Siasatan juga telah mengesyorkan tindakan-tindakan penambahbaikan yang perlu diambil tindakan oleh MAHB antara lain meliputi perkara-perkara yang melibatkan memperkukuhkan operasi Jabatan Teknologi Maklumat, merombak sistem rangkaian TAMS dan menyemak serta memperbaiki *Business Continuity Plan*. Pihak MAHB sedang mengambil tindakan-tindakan penambahbaikan sejajar dengan syor-syor yang telah dicadangkan oleh Jawatankuasa Siasatan tersebut. Sekian, terima kasih.

**PEMBERITAHUAN PERTANYAAN BAGI JAWAPAN LISAN**  
**MESYUARAT KETIGA, PENGGAL KEDUA**  
**PARLIMEN KEEMPAT BELAS**  
**MAJLIS MESYUARAT DEWAN RAKYAT**

**PERTANYAAN : JAWAB LISAN**

**DARIPADA : DATO' SRI HAJAH NANCY SHUKRI**  
**[BATANG SADONG]**

**TARIKH : 19 NOVEMBER 2019**

**SOALAN**

**DATO' SRI HAJAH NANCY SHUKRI [ BATANG SADONG ]** minta  
**MENTERI INDUSTRI UTAMA** menyatakan:-

**(a) kesan penurunan harga komoditi lada** yang berpanjangan  
**dan berapa jumlah dan peratus pekebun kecil lada di Sarawak**  
yang masih **aktif** menanam lada sehingga kini; dan

**(b) apakah langkah-langkah intervensi** oleh Kerajaan bagi  
**memastikan pekebun kecil lada akan terus mengusahakan**  
tanaman mereka.

**JAWAPAN**

Tuan Yang Di-Pertua,

Kerajaan masih meneruskan bantuan kepada pekebun kecil lada yang semakin terhimpit dengan keadaan komoditi antarabangsa yang tidak menentu serta harga yang mengalami kejatuhan. Bagi tahun 2019, Kerajaan melalui Lembaga Lada Malaysia (MPB) menyalurkan peruntukan untuk pelbagai bantuan seperti input dan peralatan pertanian, latihan dan kursus kepada pekebun lada di bawah Program Pembangunan Kawasan Penanaman Baharu Lada yang melibatkan peruntukan sebanyak RM10 juta.

## SOALAN NO : 10

Sehingga 20 Ogos 2019 bilangan pekebun kecil lada adalah seramai 33,756 orang. Seramai 33,152 orang (99.3%) adalah dari negeri Sarawak manakala 345 orang (1.02%) dari negeri Sabah dan 259 orang (0.01%) dari negeri-negeri di Semenanjung. Seterusnya, pihak Kementerian telah melaksanakan beberapa strategi yang secara tidak langsung dapat membantu dalam pengawalan harga lada seperti berikut:

- (i) mempertingkat dan memperkasakan industri hiliran lada;
- (ii) memantapkan Program Pengeluaran Lada Premium Peringkat Ladang;
- (iii) meningkatkan penggunaan lada dalam dan luar negara;
- (iv) mengeksport lada ke pasaran istimewa (*niche market*); dan
- (v) mempergiatkan program R&D Lada untuk mempelbagaikan produk di pasaran antarabangsa.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KEDUA  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATUK DR. HJ. ABD. LATIFF BIN AHMAD  
[MERSING]**

**TARIKH : 19 NOVEMBER 2019 (SELASA)**

**SOALAN**

Minta **PERDANA MENTERI** menyatakan adakah Kerajaan bersedia untuk mengkaji dan mewujudkan undang-undang pembiayaan politik bagi tujuan ketelusan serta mendokong Pelan Anti Rasuah Nasional (NACP).

**JAWAPAN: YB MOHAMED HANIPA BIN MAIDIN**

**TIMBALAN MENTERI DI JABATAN PERDANA MENTERI**

Tuan Yang di-Pertua,

1. Kerajaan komited untuk mewujudkan suatu rang undang-undang berkaitan yang mengawal sumbangan politik bagi tujuan ketelusan seperti yang dinyatakan di bawah Inisiatif 1.2.5 dalam Pelan Antirasuah Nasional (NACP) 2019-2023.
2. Kajian dan sesi libat urus bersama pelbagai pihak sedang giat dijalankan bagi mendapatkan maklum balas dan input berkaitan untuk memastikan penggubalan rang undang-undang yang komprehensif dapat disediakan dan dikuatkuasakan secara berkesan.
3. Rang undang-undang tersebut adalah dalam proses untuk dimuktamadkan dan akan dibentangkan di Parlimen setelah proses tersebut selesai kelak.

Sekian, terima kasih.

**PEMBERITAHUAN PERTANYAAN LISAN DEWAN RAKYAT**  
**MESYUARAT KETIGA PENGGAL KEDUA,**  
**PARLIMEN KEEMPAT BELAS**

---

**PERTANYAAN : LISAN**

**DARIPADA : YB DATO' MOHD. NIZAR BIN HAJI  
ZAKARIA [ PARIT ]**

**TARIKH : 19 NOVEMBER 2019**

**SOALAN**

Minta **MENTERI SUMBER MANUSIA** menyatakan :-

- (a) adakah terdapat sebarang kajian yang telah dilaksanakan oleh Kementerian bagi mengenal pasti apakah punca serta sebab utama rakyat Malaysia sanggup bekerja di Singapura walaupun dalam sektor 3D ; dan
- (b) apakah usaha yang telah dilaksanakan oleh Kerajaan bagi menggalakkan rakyat Malaysia untuk pulang bekerja di Malaysia

**JAWAPAN**

Tuan Yang di-Pertua,

1. Kementerian ini melalui *Institute of Labour Market Information and Analysis (ILMIA)* telah melaksanakan kajian “*A Study On Malaysian Working In Sinagpore*” pada tahun 2016. Statistik terkini yang dikeluarkan oleh Kementerian Tenaga Kerja Singapura menunjukkan hampir 685,979 orang warga Malaysia berkhidmat di dalam pelbagai lapangan pekerjaan di Singapura termasuk sektor 3D. Punca atau sebab yang mendorong dan menjadi faktor penarik bagi warga Malaysia bekerja di Singapura adalah seperti berikut:-

- i. Kadar tukaran wang yang lebih tinggi 1 SD : RM3.10 menawarkan upah pokok dan faedah kewangan (bayaran kerja lebih masa, elaun, bonus dsb) yang tinggi;
- ii. Graduan tempatan sanggup bekerja dalam sektor 3D di Singapura kerana tawaran upah yang menarik ekoran kadar tukaran wang yang tinggi. Purata upah yang diperolehi di Singapura dianggarkan adalah 5 kali ganda lebih tinggi daripada purata upah di negara ASEAN yang lain;
- iii. Majikan Singapura menawarkan kadar upah yang kompetitif kepada pencari kerja lepasan SPM;
- iv. Ramai belia tempatan berhijrah bekerja di Singapura ekoran pengaruh rakan sebaya; dan
- v. Majikan Singapura lebih berminat menggajikan pekerja Malaysia kerana faktor kesamaan budaya, bahasa, fahaman keagamaan, pemakanan dan sebagainya.

Tuan Yang di-Pertua,

2. Talent Corporation (TalentCorp) di bawah Kementerian Sumber Manusia (KSM) telah diberi mandat untuk menerajui Program Kepulangan Pakar atau *Returning Expert Programme (REP)* bagi memudahkan kepulangan tenaga kerja berkemahiran tinggi Malaysia di luar negara. Pelaksanaan REP juga telah melalui beberapa fasa penambahbaikan bagi memastikan kualiti modal insan berkemahiran tinggi yang diluluskan adalah selaras dengan keperluan semasa industri dan ekonomi negara.

3. Sebanyak 5,137 modal insan berkemahiran tinggi telah diluluskan di bawah program ini dari tahun 2011 sehingga April 2019, Peningkatan permohonan kembali ke tanahair melalui REP juga meningkat sebanyak 20 peratus pada tahun 2018 berbanding tahun sebelumnya.

## SOALAN NO : 12

4. Antara Sektor Industri Teratas bagi kelulusan REP ialah:
- Minyak, Gas dan Tenaga;
  - Perkhidmatan Kewangan;
  - Perkhidmatan Perniagaan;
  - Kandungan Komunikasi dan Infrastruktur;
  - Perubatan.
5. Manakala Negara Teratas bagi kelulusan REP seperti berikut:
- Singapura;
  - China;
  - Arab Saudi;
  - *United Arab Emirates* (UAE);
  - England.
6. Melalui inisiatif REP yang ditawarkan kepada warga Malaysia yang bekerja di luar negara, ianya diharap akan menggalakkan lebih ramai pakar-pakar berkemahiran tinggi untuk menyumbang tenaga dengan kembali berkhidmat di Malaysia. Ia juga akan dapat merapatkan jurang kemahiran yang diperlukan untuk pembangunan negara di samping mengurangkan kebergantungan industri kepada ekspatriat dan pekerja asing.
7. Laporan Bank Dunia yang diterbitkan dengan kerjasama Unit Perancang Ekonomi (UPE) Jabatan Perdana Menteri (JPM) dan TalentCorp pada Jun 2015 yang bertajuk, *“Assessment of Returning Expert Programme (REP) & Residence Pass-Talent”* menyatakan bahawa antara faktor-faktor utama yang telah dikenalpasti menyumbang kepada isu pengaliran keluar tenaga-tenaga pakar dan profesional tempatan ke luar negara adalah seperti berikut:
- Pertama, peluang pekerjaan yang lebih menarik;
  - Kedua, kualiti dan tahap pendidikan;
  - Ketiga, latihan dan pendedahan kepada prospek kerjaya; dan
  - Keempat, tahap kualiti hidup yang lebih tinggi.



**SOALAN TAMBAHAN 1**

**Berapakah bilangan warganegara yang sedang bermastautin di negara asing dan apakah situasi keadaan “brain drain” negara kita.**

**JAWAPAN**

Tuan Yang di-Pertua,

1. Menerusi Laporan *Malaysia Economic Monitor: Brain Drain* yang diterbitkan oleh Bank Dunia dengan kerjasama Kerajaan Malaysia pada April tahun 2011, kira-kira satu juta rakyat Malaysia menetap di luar negara, di mana satu-pertiga daripada jumlah tersebut merupakan tenaga berkepakaran tinggi. Namun begitu, laporan tersebut turut mengakui bahawa penghijrahan sedemikian bukan terhad hanya kepada Malaysia, malah fenomena penghijrahan ini turut berlaku kepada negara-negara lain memandangkan terdapat *global war for talent*.

2. Seterusnya, Laporan Bank Dunia dengan kerjasama *Talent Corporation Malaysia Berhad (TalentCorp)* dan *Institute of Labor Market Information Analysis (ILMIA)* pada Jun 2015 yang bertajuk, “*Assessment of Returning Expert Programme (REP) & Residence Pass-Talent*” pula menjelaskan bahawa inisiatif REP di bawah seliaan Talent Corporation Malaysia Berhad (TalentCorp) adalah efektif bagi memudahkan kepulangan tenaga kerja pakar yang diperlukan di Malaysia. Bank Dunia juga menyebut bahawa usaha memudahkan kepulangan rakyat Malaysia berkemahiran tinggi merupakan instrumen bagi membantu memenuhi keperluan pasaran pekerjaan dan industri sekaligus merapatkan jurang perbezaan kemahiran (*skills gap*).

3. TalentCorp telah diberi mandat untuk menerajui program REP bagi memudahkan kepulangan tenaga kerja berkemahiran tinggi Malaysia di luar negara. Pelaksanaan REP juga telah melalui beberapa fasa penambahbaikan bagi memastikan kualiti

## SOALAN NO : 12

modal insan berkemahiran tinggi yang diluluskan adalah selaras dengan keperluan semasa industri dan ekonomi negara.

4. Usaha TalentCorp juga tidak terhad kepada pelaksanaan REP sahaja bahkan ianya turut merangkumi pendekatan untuk menghubungkan tenaga kerja mahir Malaysia di luar negara dengan peluang pekerjaan tersedia dalam negara. Pendekatan ini juga selaras dengan laporan Bank Dunia seperti di atas yang menyatakan bahawa rakyat Malaysia yang telah mendapat pekerjaan lebih cenderung untuk pulang ke Malaysia.

5. Di samping itu, sesi temu seru di luar negara juga turut diadakan terutamanya di negara yang dikenali mempunyai populasi rakyat Malaysia yang tinggi. Sesi temu seru ini diadakan dengan keterlibatan syarikat Malaysia dengan matlamat untuk mengetengahkan peluang-peluang pekerjaan profesional yang terbuka luas di Malaysia.

6. Menyedari bahawa kejayaan REP banyak dipengaruhi oleh faktor luaran (contoh: keadaan ekonomi negara, kadar tukaran mata wang, sistem pendidikan, status kewarganegaraan ahli keluarga), TalentCorp telah mengambil langkah strategik untuk memudahkan para profesional yang kini berada di perantauan untuk masih memberikan sumbangan dan berkongsi kepakaran mereka untuk pembangunan negara melalui pendekatan-pendekatan berikut:

- a. Perkongsian, pertukaran dan pemindahan ilmu pengetahuan, kemahiran, teknologi dan kajian dalam bidang pembelajaran dan pertumbuhan utama negara;
- b. Memudahkan jaringan perhubungan untuk memacu lebih banyak sumbangan dari diaspora;
- c. Mewujudkan ruang perniagaan melalui perkongsian, usaha sama dan peluang pelaburan;

**SOALAN NO : 12**

- d. Platform perkongsian hasil kajian dan syor-syor penambahbaikan berkaitan dengan sektor utama ekonomi; dan
- e. Khidmat rundingan profesional dan maklumat dalam bidang kepakaran masing-masing.

**PEMBERITAHUAN PERTANYAAN BAGI JAWAPAN LISAN**  
**MESYUARAT KETIGA, PENGGAL KEDUA, PARLIMEN KE-14**  
**(DEWAN RAKYAT)**

**PERTANYAAN : LISAN**

**DARIPADA : PUAN ALICE LAU KIONG YIENG [ LANANG ]**

**TARIKH : 19 NOV 2019 (SELASA)**

**SOALAN :**

**PUAN ALICE LAU KIONG YIENG [ LANANG ]** minta **MENTERI INDUSTRI UTAMA** menyatakan langkah-langkah yang telah dan akan diambil oleh Kementerian untuk membantu kesemua pengusaha minyak sawit terutama pengusaha minyak sawit kecil supaya mendapatkan Pensijilan Minyak Sawit Mampan Malaysia (MSPO) yang akan dilaksanakan secara wajib menjelang Disember 31, 2019 memandangkan pensijilan tersebut melibatkan kos yang amat tinggi dan setakat ini berapakah peratus pengusaha minyak sawit di Sarawak telah berjaya mendapat Pensijilan MSPO ini.

**JAWAPAN**

Tuan Yang Di-Pertua,

Bagi meringankan bebanan kewangan para pekebun kecil persendirian, perbelanjaan pelaksanaan Pensijilan Minyak Sawit Mampan Malaysia (MSPO) adalah ditanggung sepenuhnya oleh Kerajaan yang merangkumi kos latihan, kos pengauditan, kos pembelian alat pelindungan peribadi dan rak bahan kimia.

Kerajaan juga telah meningkatkan kadar insentif kos pengauditan MSPO daripada 70% kepada 100% dan memberi insentif baharu kos persediaan MSPO sebanyak 50% bagi estet-estet yang berkeluasan 40.46 hingga 1,000 hektar. Manakala, insentif bagi pekebun kecil tersusun juga telah ditingkatkan daripada RM10 sehektar kepada RM55 sehektar. Bagi

para pengilang, Kerajaan memberi insentif sehingga 30% dari kos pengauditan pensijilan tersebut.

Sehingga 31 Oktober 2019, seluas 3.42 juta hektar atau 58.5% daripada 5.85 juta hektar tanaman sawit di Malaysia telah mendapat pensijilan MSPO. Pensijilan ini meliputi 2.52 juta hektar ladang dan 441,000 hektar pekebun kecil. Manakala, kilang buah sawit yang telah mendapat pensijilan MSPO adalah sebanyak 288 buah kilang atau 64% daripada keseluruhan kilang buah sawit di Malaysia.

Bagi negeri Sarawak pula, seluas 908,015 hektar atau 58% daripada 1.57 juta hektar tanaman sawit di Sarawak telah dipersijilkan MSPO. Manakala, kilang buah sawit yang telah mendapat pensijilan MSPO adalah sebanyak 57 buah kilang atau 70% daripada keseluruhan kilang buah sawit di Sarawak.

Bagi pekebun kecil yang masih belum memperolehi pensijilan MSPO, Kementerian melalui Lembaga Minyak Sawit Malaysia (MPOB) sedang berusaha untuk mempersiapkan pekebun kecil ini mendapatkan pensijilan MSPO.

MPOB secara berterusan akan memberi latihan kepada pekebun kecil sawit di seluruh Malaysia meliputi kawasan pendalaman, kampung, daerah dan negeri. Selain itu, Kementerian dan MPOB turut bekerjasama dengan agensi-agensi pengurusan pekebun kecil seperti Lembaga Kemajuan Tanah Persekutuan (FELDA), Lembaga Penyatuan dan Pemulihan Tanah Persekutuan (FELCRA) dan Lembaga Penyatuan dan Pemulihan Tanah Sarawak (SALCRA) dalam melaksanakan pensijilan MSPO untuk pekebun kecil sawit ini. Kementerian juga telah bekerjasama dengan Kerajaan Negeri terutamanya bagi menangani isu-isu penukaran syarat nyata tanah.

Pihak kementerian juga sedang giat menjalankan Program Jelajah MSPO untuk penanam sawit seluruh negara. Sebanyak 274 taklimat MSPO telah dianjurkan dari Januari hingga September 2019 yang melibatkan 40,773 peserta.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN AHMAD TARMIZI BIN SULAIMAN [ SIK ]**

**TARIKH : 19 NOVEMBER 2019 (SELASA)**

**SOALAN NO. 14**

Minta **MENTERI HAL EHWAL EKONOMI** menyatakan langkah untuk menyusun semula projek penanaman semula getah dan kelapa sawit kepada pekebun kecil yang masih tidak dapat diuruskan dengan sempurna oleh agensi terbabit termasuk RISDA dan lain-lain.

**JAWAPAN**

Tuan Yang di-Pertua,

1. Sebagai makluman Ahli Yang Berhormat, Kerajaan melalui RISDA memberi bantuan kepada pekebun kecil melaksanakan tanam semula getah. Pendekatan tanam semula yang diperkenalkan oleh RISDA adalah:

- i. Tanam Semula Individu (TSI) iaitu pekebun kecil mengusaha dan menguruskan sendiri kebun mereka.
- ii. Tanam Semula Berkelompok (TSB) iaitu sekumpulan pekebun kecil sekurang-kurangnya 8 orang mengusahakan kebun-kebun mereka sendiri, dengan diuruskan oleh jawatankuasa yang dilantik dari kalangan mereka.
- iii. Tanam Semula Komersil (TSK) iaitu pekebun kecil bersetuju supaya kebun mereka diusaha dan diuruskan oleh anak

syarikat RISDA dengan satu kontrak perjanjian yang dipersetujui bersama.

- iv. Tanam Semula Agensi (TSA) iaitu Agensi (FELDA, FELCRA, JAKOA, KESEDAR) mengusaha dan menguruskan projek tanam semula bagi kebun-kebun peneroka atau peserta di bawah kawal selia Agensi berkenaan di mana RISDA menyalurkan bantuan bagi projek tanam semula tersebut.

2. Bagi memastikan kejayaan projek penanaman semula getah yang diusaha dan diuruskan oleh pekebun kecil, RISDA melaksanakan beberapa program seperti:

- i. Bimbingan dan Latihan Amalan Pertanian Baik (GAP) secara berterusan di dalam kebun bertujuan memberi pengetahuan dan teknik yang tepat serta menerapkan kaedah pengurusan kebun yang betul dan sempurna untuk diamalkan oleh pekebun kecil.
- ii. Latihan Teknikal di Institut Kemajuan Pekebun Kecil (IKPK) bertujuan memberi pengetahuan dan teknik yang tepat mengikut norma-norma yang sesuai dengan penggunaan teknologi yang disyorkan.
- iii. Kursus Pembangunan Pekebun Kecil bertujuan memberi kesedaran dan motivasi ke arah perubahan sikap, minda dan jati diri.

3. Dengan pelaksanaan program di atas projek penanaman semula getah boleh dijayakan dan diuruskan dengan sempurna oleh pekebun kecil.

4. Walau bagaimanapun, RISDA turut mengambil maklum bahawa terdapat beberapa isu yang mempengaruhi program tanam semula getah dan kelapa sawit. Ini termasuklah kos pembangunan kebun yang semakin meningkat terutamanya bagi kerja-kerja menebang, membina teres dan membuat pagar. Selain itu, kekurangan infrastruktur prasarana asas pertanian terutamanya bagi kebun yang jauh dari jalan utama juga

menyebabkan kesukaran untuk menghantar anak benih dan baja, pelaksanaan aktiviti GAP dan pengeluaran hasil.

5. Sehubungan itu, RISDA telah mengambil tindakan proaktif untuk menangani isu tersebut seperti:

- i. menggalakkan penanaman semula dilaksanakan secara berkelompok atau berkumpulan melalui seperti Tanam Semula Berkelompok atau Tanam Semula Serentak supaya kos sewaan jentera, kos tenaga kerja dan lain-lain kos pembangunan tanah dapat dijimatkan apabila keluasan tanah dibangunkan dalam skala lebih besar.
- ii. Selain itu, Prasarana Asas Pertanian seperti jalan pertanian, pembentung, parit, jambatan dan sebagainya dapat dibina secara berkelompok bagi memudahkan pekebun kecil menyelenggara kebun serta mengeluarkan hasil kebun.

6. Usaha-usaha penambahbaikan ini akan dapat memastikan projek penanaman semula getah dan kelapa sawit dapat dilaksanakan oleh pekebun kecil dengan jayanya.

Sekian, terima kasih.



**PEMBERITAHUAN PERTANYAAN BAGI JAWAPAN LISAN**  
**MESYUARAT KETIGA, PENGGAL KEDUA**  
**PARLIMEN KEEMPAT BELAS**  
**MAJLIS MESYUARAT DEWAN RAKYAT**

**PERTANYAAN : PERTANYAAN-PERTANYAAN JAWAB LISAN**

**DARIPADA : TUAN AWANG HUSAINI BIN SAHARI [ PUTATAN ]**

**TARIKH : 19 NOVEMBER 2019**

**SOALAN**

**TUAN AWANG HUSAINI BIN SAHARI [ PUTATAN ]** minta **MENTERI INDUSTRI UTAMA** menyatakan bahawa apakah usaha dan langkah Kementerian dalam membantu pekebun-pekebun kecil di negeri Sabah terutamanya dalam aspek pembangunan infrastruktur ladang seperti perhubungan jalan raya, "culvert" dan jeti pemunggahan getah dan susu getah. Kita sedar bahawa Kementerian sentiasa peka dengan pekebun-pekebun kecil di negeri Sabah lebih-lebih lagi Sabah merupakan pengeluar getah kedua terbesar di Malaysia dengan memberikan skim galakan tanam semula getah, insentif pengeluaran getah serta pelbagai lagi skim galakan.

**JAWAPAN**

Tuan Yang Di-Pertua,

Untuk Negeri Sabah, usaha-usaha adalah di bawah Kerajaan Negeri melalui agensi Lembaga Industri Getah Sabah (LIGS). Pihak Kementerian percaya pihak LIGS sedang melaksanakan usaha dan mengambil langkah yang terbaik untuk pekebun kecil di Sabah. Agensi di bawah Kementerian boleh membantu dari aspek teknikal dan khidmat kaji runding sekiranya mendapat permintaan daripada pihak LIGS ke arah usaha tersebut.

**PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KEDUA  
PARLIMEN KE-EMPAT BELAS**

**PERTANYAAN : LISAN**

**DARIPADA : DATUK DR. JEFFREY GAPARI KITINGAN  
[ KENINGAU ]**

**TARIKH : 19 NOVEMBER 2019 (SELASA)**

**SOALAN NO. 16**

Minta **MENTERI PENGANGKUTAN** menyatakan bilakah Kementerian bercadang untuk membangunkan terminal bas dan hab pengangkutan awam sentral di Keningau bagi menampung segala pengangkutan awam di satu tempat yang bersesuaian.

**JAWAPAN**

Yang di-Pertua,

1. Untuk makluman Yang Berhormat, Kementerian Pengangkutan mengambil maklum dan turut mengambil berat terhadap pembangunan pengangkutan awam di Sabah. Seperti Yang Berhormat sedia maklum, kuasa pembangunan infrastruktur pengangkutan awam di Negeri Sabah adalah terletak di bawah bidang kuasa Kerajaan Negeri.

2. Namun demikian, Kementerian ini bersedia untuk membantu dalam pembangunan infrastruktur pengangkutan awam di Sabah melalui inisiatif kerjasama awam swasta. Inisiatif ini secara tidak langsung akan dapat mengurangkan beban kewangan dan pentadbiran Kerajaan, meningkatkan kecekapan dan daya pengeluaran, mempercepatkan pertumbuhan ekonomi, membantu mencapai matlamat dasar ekonomi negara serta memastikan kejayaan konsep Malaysia *Incorporated*.  
Sekian, terima kasih.

**PEMBERITAHUAN PERTANYAAN**  
**MESYUARAT KETIGA, PENGGAL KEDUA,**  
**PARLIMEN KEEMPAT BELAS,**  
**DEWAN RAKYAT**

**PERTANYAAN : LISAN**

**DARIPADA : TUAN JUGAH ANAK MUYANG @  
TAMBAT [ LUBOK ANTU ]**

**TARIKH : 19 NOVEMBER 2019**

**SOALAN**

**TUAN JUGAH ANAK MUYANG @ TAMBAT [ LUBOK ANTU ]** minta **PERDANA MENTERI** menyatakan data penjawat awam di Sarawak khasnya daripada segi keseimbangan pembahagian komposisi kaum khasnya kaum Dayak (Iban) dalam menjawat jawatan tertinggi Kerajaan di sektor awam.

**JAWAPAN: YB TUAN MOHAMED HANIPA BIN MAIDIN**  
**TIMBALAN MENTERI DI JABATAN PERDANA MENTERI**

Tuan Yang di-Pertua,

Untuk makluman Ahli Yang Berhormat, Pada masa ini, Pecahan komposisi Kumpulan Pengurusan Tertinggi mengikut kaum yang bertugas di Sarawak adalah seperti berikut:

KAUM	BILANGAN	PERATUS
Melayu/ Melayu Sarawak	48	39.67%
Cina	46	38.02%
Dayak	13	10.74%
Melanau	6	4.96%
India	4	3.31%

**SOALAN NO : 17**

Bisayah	1	0.83%
Kadazan	1	0.83%
Kedayan	1	0.83%
Kelabit	1	0.83%
<b>JUMLAH</b>	<b>121</b>	<b>100.00%</b>

**Keseluruhan pegawai awam kaum Dayak** dalam Kumpulan Pengurusan Tertinggi di kesemua agensi Kerajaan adalah seramai **31 orang**. Pegawai awam kaum **Dayak** dalam Kumpulan Pengurusan Tertinggi yang **bertugas di Sarawak** hanyalah seramai **13 orang**.

Kerajaan tanpa mengira kaum, bangsa dan agama sentiasa memberi ruang dan peluang yang saksama kepada penjawat awam untuk mengisi jawatan di peringkat pembuat keputusan dan strategik, termasuk jawatan KSU dan KP selaras dengan peruntukan di bawah Pekeliling Perkhidmatan Bilangan 7 Tahun 2010 - Panduan Pengurusan Pemangkuan Dan Kenaikan Pangkat Dalam Perkhidmatan Awam.

Memandangkan bilangan jawatan-jawatan tersebut adalah terhad, proses pertimbangan pengisian perlu melalui suatu proses pemilihan yang ketat berdasarkan **merit, prestasi, kelayakan, kompetensi, daya kepimpinan, pengalaman, integriti dan kesesuaian penerimaan di peringkat Kementerian atau Jabatan**. Ini adalah bagi memastikan, pegawai yang mengisi jawatan-jawatan berkenaan adalah terdiri daripada pegawai yang kompeten dan berkebolehan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT**  
**MESYUARAT KETIGA PENGGAL KEDUA,**  
**PARLIMEN KEEMPAT BELAS**

---

**PERTANYAAN : LISAN**

**DARIPADA : YB DATO' MOHD. NIZAR BIN HAJI  
ZAKARIA [ PARIT ]**

**TARIKH : 19 NOVEMBER 2019**

**SOALAN**

Minta **MENTERI SUMBER MANUSIA** menyatakan :-

- (a) sejauh manakah kajian yang dilakukan oleh pihak Kerajaan berkaitan kesan-kesan pengenalan Revolusi Industri 4.0?; dan
- (b) apakah langkah yang diambil oleh pihak Kerajaan dalam menangani masalah banjiriran pengangguran akibat pengenalan Revolusi Industri 4.0.

**JAWAPAN**

Tuan Yang di-Pertua,

1. Industri 4.0 dijangka akan memberi kesan yang sangat signifikan kepada pasaran buruh dan pekerjaan seperti pewujudan dan penghapusan pekerjaan (*job displacement*), peningkatan produktiviti buruh dan jurang kemahiran yang semakin meluas. Oleh itu, modal insan negara perlu mempunyai kemahiran yang relevan dan sentiasa memenuhi keperluan pasaran dan ekonomi negara yang dinamik. Dalam hal ini, Dasar Industry4WRD telah diperkenalkan pada tahun 2018 yang diterajui oleh Kementerian Perdagangan Antarabangsa dan Industri (MITI). Kementerian Sumber Manusia (KSM) dan Kementerian Pendidikan Malaysia

## SOALAN NO : 18

(KPM) telah diberikan peranan sebagai Pengerusi Bersama bagi menerajui Jawatankuasa Kerja Pembangunan Kemahiran dan Bakat (*Technical Working Group-Skills*) di bawah Industry4WRD. Pelbagai usaha dilaksanakan oleh KSM dalam memperkukuh kompetensi sumber manusia bagi mengenal pasti pekerjaan yang bersesuaian dalam menghadapi Industri 4.0 melalui Jabatan dan Agensi di bawahnya seperti:

- (i) menyediakan program *upskilling* dan *reskilling* kepada golongan pekerja bagi mempertingkatkan kemajuan sendiri dalam menyesuaikan diri dengan perubahan keperluan kerja masa hadapan (*future jobs*) serta persekitaran global yang semakin kompetitif dan dinamik;
- (ii) KSM melalui Jabatan Pembangunan Kemahiran (JPK), telah membangunkan *National Occupational Skills Standard* (NOSS) bagi 21 sektor ekonomi yang mana telah menjadi rujukan dalam pembangunan program latihan di institusi-institusi latihan awam dan swasta mengikut tahap kemahiran yang diperlukan. NOSS yang dibangunkan dan dipantau secara bersama dengan *Industry Lead Body* (ILB) adalah mengikut keperluan industri dan teknologi terkini; dan
- (iii) mengadakan sesi libat urus dengan pihak industri bersama jabatan/agensi terlibat bagi memberi gambaran jelas berkaitan Industri 4.0. Maklumat hasil perkongsian daripada sesi ini akan seterusnya digunakan untuk mengkaji dan meneliti keperluan tenaga kerja bagi menghadapi Industri 4.0 seterusnya mewujudkan peluang pekerjaan baharu; dan
- (iv) memperluas akses kepada warganegara untuk mendapatkan Latihan dan Pendidikan Teknikal dan Vokasional (TVET). Sehingga kini, terdapat lima ratus enam puluh dua (562) buah Institusi Latihan Kemahiran Awam (ILKA) yang telah ditubuhkan di seluruh negara dengan pelbagai kursus kemahiran

## SOALAN NO : 18

ditawarkan mengikut keperluan industri (sumber: Statistik Pekerjaan dan Perburuhan Siri 19 Bil.1/2019).

- (a) Sebagai usaha bagi mengatasi kadar pengangguran, Kerajaan telah mengambil langkah-langkah berikut:
- (i) Menyediakan perkhidmatan pekerjaan *JobsMalaysia* yang memberi kemudahan kepada pencari kerja untuk mendapatkan kerja yang bersesuaian melalui pendekatan pemadanan kerja. Bagi memenuhi keperluan semasa dan menambahbaikkan kecekapan pasaran buruh, Portal *JobsMalaysia* telah dirombak serta dinaikkan taraf dan dikenali sebagai Portal JM2.0 yang telah dilancarkan pada September 2018;
  - (ii) Menganjurkan Program Penempatan Pekerjaan yang merangkumi Karnival Kerjaya, penempatan melalui *Client Account*, Temuduga Terbuka, Program Kerjasama Antara Agensi, *Holiday Placement For Students* (HOPS), Penempatan Dengan Kerjasama APS, Program Penempatan Golongan Khas serta Program Penyesuaian Kerjaya (2PK). Program-program ini telah diadakan dari semasa ke semasa bagi menemukan pencari kerja dengan majikan yang sepadan. Bagi tempoh Januari-Jun 2019, seramai 22,563 orang pencari kerja telah berjaya mendapat penempatan;
  - (iii) Mewujudkan pusat sehenti menggabungkan agensi seperti *JobsMalaysia*, Pertubuhan Keselamatan Sosial (PERKESO), Pembangunan Sumber Manusia Berhad (PSMB) dan Unit Peneraju Agenda Bumiputera (TERAJU) di UTC bagi menyediakan khidmat nasihat profesional untuk mendapatkan pekerjaan dan latihan;
  - (iv) Melaksanakan program *Graduates Enhancement Programme For Employability* (GENERATE 2.0) bertujuan membantu golongan muda di kalangan

## SOALAN NO : 18

graduan menganggur untuk mengikuti latihan dalam bidang berimpak tinggi bersesuaian dengan keperluan industri dan seterusnya diberikan jaminan penempatan pekerjaan di syarikat yang berdaftar dengan Pembangunan Sumber Manusia Berhad (PSMB). Semenjak diperkenalkan pada tahun 2016 sehingga tahun 2018, seramai 4,030 graduan telah dilatih dengan bantuan kewangan diluluskan berjumlah RM76.95 juta. Daripada jumlah tersebut, seramai 2,991 pelatih telah berjaya mendapat pekerjaan di mana gaji permulaan bagi pemegang diploma ialah minimum RM2,000 sebulan manakala bagi pemegang ijazah RM3,000 sebulan;

- (v) Mengukuhkan dan memperkasakan Program Sistem Latihan *Dual* Nasional (SLDN) melalui pelbagai program dan kerjasama bagi mengurangkan jurang ketidakpadanan kemahiran dengan keperluan industri. Program SLDN menawarkan latihan berasaskan industri dengan 70% latihan praktikal di syarikat dan 30% teori di institusi latihan;
- (vi) Melaksanakan program *Structured Internship Programme* (SIP) yang diterajui Talent Corp dengan kerjasama Kementerian Pendidikan Malaysia (KPM). Di bawah SIP, graduan akan mendapat pendedahan awal kepada dunia pekerjaan sebelum menamatkan pengajian supaya mereka lebih berdaya saing dan memiliki kemahiran yang memenuhi keperluan industri. Seramai 76,000 belia di kalangan pelajar universiti dan pelatih TVET telah menerima manfaat di bawah program ini



**PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KEDUA  
PARLIMEN KE-EMPAT BELAS**

**PERTANYAAN : LISAN**

**DARIPADA : TUAN LIM KIT SIANG  
(ISKANDAR PUTERI)**

**TARIKH : 19 NOVEMBER 2019 (SELASA)**

**SOALAN NO. 19**

Minta **MENTERI PENGANGKUTAN** menyatakan jumlah kutipan "*Road Charge*" yang dibayar oleh kenderaan asing yang memasuki Malaysia melalui Link Kedua dan Tambak Johor setiap tahun dari 2016 hingga 2019 dan sama ada Kerajaan berhasrat memanfaatkan hasil ini untuk menambahbaik pengangkutan awam di Tambak Johor dan Link Kedua.

**JAWAPAN**

Yang di-Pertua,

1. Untuk makluman Yang Berhormat, kutipan Caj Jalan yang dikenakan kepada kenderaan persendirian Singapura sehingga 30 September 2019 adalah sebanyak RM 316,419,780.00 Pecahan mengikut tahun ialah RM17,309,440.00 untuk tahun 2016, RM106,734,660.00 untuk tahun 2017, RM108,390,300.00 untuk tahun 2018 dan RM83,985,580.00 untuk tahun 2019 (sehingga 30 September 2019).

2. Kementerian Pengangkutan mengambil perhatian dan sedang meneliti, membuat kajian dan juga perancangan untuk menambah baik perkhidmatan pengangkutan awam di seluruh negara termasuk di Negeri Johor. Sebarang mod pengangkutan yang akan dibangunkan bergantung kepada faktor-faktor seperti analisa *demand*, laluan dan faktor kewangan. Mod yang bersesuaian akan dipilih mengikut faktor-faktor ini samada di jalan atau rel.

Sekian, terima kasih.

**PEMBERITAHUAN PERTANYAAN BAGI JAWAPAN LISAN**  
**MESYUARAT KETIGA, PENGKAL KEDUA, PARLIMEN KE-14**  
**(DEWAN RAKYAT)**

**PERTANYAAN : LISAN**  
**DARIPADA : TUAN SHAHARIZUKIRNAIN BIN ABD. KADIR**  
**[ SETIU ]**  
**TARIKH : 19 NOV 2019 (SELASA)**

**SOALAN**

**TUAN SHAHARIZUKIRNAIN BIN ABD. KADIR [ SETIU ]** minta **MENTERI INDUSTRI UTAMA** menyatakan kewajaran menghapuskan skim bantuan penanaman semula kepada pekebun kecil iaitu Skim Tanam Semula Sawit Pekebun Kecil (TSSPK).

**JAWAPAN**

Tuan Yang Di-Pertua,

Skim terdahulu yang dikenali sebagai TSSPK merupakan skim di bawah Rancangan Malaysia Kesepuluh (RMKe-10) yang telah dirancang mengikut kesesuaian dalam tempoh dari tahun 2011 hingga 2015.

Manakala, Skim Pembiayaan Mudah Tanam Semula Pekebun Kecil Sawit (TSPKS) adalah merupakan program yang dirancang berdasarkan formulasi yang terbaik mengikut situasi ekonomi semasa. Skim ini juga merangkumi keperluan terkini para pekebun kecil sawit dalam melaksanakan aktiviti penanaman semula. Skim ini adalah terbuka kepada mereka yang layak yang mempunyai pokok sawit berumur melebihi 25 tahun dan ke atas dengan keluasan maksimum 6.5 hektar.

Mengikut perangkaan, pekebun kecil sawit dalam kelompok ini mempunyai keupayaan untuk melaksanakan aktiviti tanaman dengan bantuan minima kerajaan berbanding kumpulan sasaran lain yang lebih memerlukan bantuan sepenuhnya seperti skim untuk membantu mendapatkan Pensijilan Minyak Sawit Mampan Malaysia (MSPO) bagi pekebun kecil persendirian. Sekian, terima kasih.

**PEMBERITAHUAN PERTANYAAN**  
**MESYUARAT KETIGA, PENGGAL KEDUA,**  
**PARLIMEN KEEMPAT BELAS DEWAN RAKYAT**

**PERTANYAAN : LISAN**

**DARIPADA : TUAN WONG LING BIU [ SARIKEI ]**

**TARIKH : 19 NOVEMBER 2019**

**SOALAN**

**TUAN WONG LING BIU [ SARIKEI ]** minta **PERDANA MENTERI** menyatakan berapa ramaikah kakitangan Kerajaan yang ideal. Apakah langkah-langkah yang diambil oleh Kerajaan bagi mengurangkan kakitangan Kerajaan di dalam negara.

**JAWAPAN: YB TUAN MOHAMED HANIPA BIN MAIDIN**  
**TIMBALAN MENTERI DI JABATAN PERDANA MENTERI**

Tuan Yang di-Pertua,

Untuk makluman Ahli Yang Berhormat, jumlah keseluruhan perjawatan perkhidmatan awam pada masa kini adalah sebanyak 1.71 juta dengan pengisian sebanyak 1.57 juta (91.5%) yang merangkumi perkhidmatan awam persekutuan, badan berkanun persekutuan, perkhidmatan awam negeri, badan berkanun negeri dan pihak berkuasa tempatan. Kerajaan berpandangan jumlah perjawatan ini boleh dikurangkan tanpa menjejaskan prestasi penyampaian perkhidmatan supaya selaras dengan sasaran yang ditetapkan di dalam RMKe 11 iaitu mencapai saiz perkhidmatan awam kepada penduduk dengan nisbah 1:20 berbanding 1:19 pada masa sekarang.

Sehubungan itu, Kerajaan dalam proses untuk menstrukturkan semula jumlah perjawatan dalam perkhidmatan awam berdasarkan kedudukan ekonomi negara dan perkembangan teknologi semasa melalui pelbagai kaedah/mekanisme dan langkah antaranya kajian pertindihan fungsi antara jabatan/agensi, rasionalisasi perjawatan, pengoptimuman sumber manusia,

serah urus fungsi (*outsourcing*), penyampaian perkhidmatan alternatif (*Alternative Service Delivery*), penswastaan, penggunaan teknologi dan pengisian jawatan secara berhemah mengikut keperluan.

Perjawatan yang dikenal pasti untuk dimansuhkan adalah termasuk jawatan kosong yang tidak diperlukan, jawatan di agensi yang mempunyai pertindihan fungsi dan jawatan bagi perkhidmatan yang boleh diautomasi, diserah urus fungsi (*outsourcing*) serta yang boleh digantikan perkhidmatan alternatif. Sehubungan itu, Kerajaan menjangkakan ianya tidak akan memberi kesan kepada tugas-tugas sedia ada memandangkan jawatan yang dimansuhkan ini merupakan jawatan yang tidak diperlukan dan tidak melibatkan penyandang sedia ada. Tiada pengurangan kakitangan awam sedia ada dalam pelaksanaan dasar ini. Bagi maksud ini, Kerajaan telah menubuhkan Jawatankuasa Cadangan Rasionalisasi Jabatan/Agensi yang diterajui oleh Kementerian Kewangan Malaysia dan Jabatan Perkhidmatan Awam bagi mengenal pasti pertindihan fungsi antara jabatan/agensi dan mencadangkan jabatan/agensi tersebut dirasionalisasikan termasuk penswastaan.

Kerajaan juga berhasrat untuk mewujudkan lebih banyak peluang pekerjaan di sektor swasta dengan gaji yang lebih lumayan bagi mengurangkan pergantungan rakyat terhadap pekerjaan di sektor awam. Sehubungan itu, melalui konsep penswastaan, fungsi-fungsi tertentu yang dilaksanakan oleh jabatan/agensi kerajaan yang boleh menjana hasil secara konsisten dan berdaya maju adalah berpotensi untuk diswastakan. Melalui penswastaan, keupayaan dan kemampuan untuk menjana pendapatan sendiri dapat dipertingkatkan serta mengurangkan pembiayaan kerajaan terhadap perbelanjaan operasi jabatan/agensi berkenaan.

Dengan perkembangan teknologi terkini, Kerajaan percaya perkhidmatan awam akan lebih produktif apabila pembaziran dihapuskan, pengagihan sumber dilaksanakan dengan cekap dan guna tenaga diganti dengan penggunaan teknologi maklumat serta komputer. Sektor awam sewajarnya hanya memfokuskan kepada penyediaan dasar utama, menentukan arah dan penyediaan perkhidmatan serta tidak terbabit secara aktif dalam aktiviti ekonomi perdagangan di Malaysia.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KEDUA  
PARLIMEN KEEMPAT BELAS (2019)**

---

**PERTANYAAN : LISAN**

**DARIPADA : YB DATO' HAJI MOHD. SALIM SHARIF  
(JEMPOL)**

**TARIKH : 19 NOVEMBER 2019**

**SOALAN**

Minta **PERDANA MENTERI** menyatakan statistik terkini pemegang sijil halal Jabatan Kemajuan Islam Malaysia (JAKIM) yang telah didaftarkan mengikut kaum, negeri, produk dan perkhidmatan serta perancangan untuk meningkatkan jumlah pemegang sijil tersebut.

**JAWAPAN : (YB DATUK SERI DR. MUJAHID BIN YUSOF,  
MENTERI DI JABATAN PERDANA MENTERI)**

Tuan Yang di-Pertua,

1. Untuk makluman Ahli Yang Berhormat, pensijilan halal terbuka kepada semua tanpa mengira kaum atau bangsa berdasarkan ISO/IEC 17065. Statistik terkini sehingga 25 September 2019 pemegang Sijil Pengesahan Halal Malaysia seluruh negara adalah sebanyak 12,843 syarikat dengan jumlah produk yang dipersijilkan sebanyak 257,490. Sebanyak 3,111 premis makanan dan 403 bagi rumah sembelihan serta 136 syarikat logistik. Adapun jumlah yang diluluskan mengikut negeri bagi tahun 2019 merujuk kepada Pihak Berkuasa Pensijilan Halal adalah sebagaimana berikut :-

<b>BIL</b>	<b>PIHAK BERKUASA BERWIBAWA</b>	<b>JUMLAH LULUS</b>
1.	SELANGOR	1395
2.	JAKIM	1,336
3.	JOHOR	595
4.	PULAU PINANG	462
5.	MELAKA	259
6.	PERAK	246
7.	NEGERI SEMBILAN	238
8.	PAHANG	164
9.	KEDAH	161
10.	SARAWAK	110
11.	TERENGGANU	97
12.	SABAH	86
13.	KELANTAN	49
14.	PERLIS	17

*Jadual 1 : Kelulusan SPHM Jan-25 September 2019*

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KEDUA  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN WILLIAM LEONG JEE KEEN  
(SELAYANG)**

**TARIKH : 19 NOVEMBER 2019 (ISNIN)**

**SOALAN NO. 21**

minta **PERDANA MENTERI** menyatakan usaha-usaha Kerajaan bagi menangani ucapan kebencian kaum dan agama yang mengancam keharmonian dan perpaduan kaum khususnya ahli-ahli politik dan pemimpin negara yang membuat kenyataan berunsur perkauman dan agama.

**JAWAPAN : YB SENATOR TUAN WAYTHA MOORTHY A/L  
PONNUSAMY, MENTERI DI JABATAN PERDANA  
MENTERI (PERPADUAN NEGARA DAN  
KESEJAHTERAAN SOSIAL)**

Yang di-Pertua,

Kerajaan di bawah kepimpinan YAB Tun Dr. Mahathir Mohamad, Perdana Menteri Malaysia, sentiasa peka dan sensitif terhadap isu-isu yang menyentuh kaum dan agama dan akan sentiasa memastikan keharmonian terus terpelihara melalui langkah-langkah berikut:

- (i) mengingatkan pemimpin parti politik supaya menjaga sensitiviti kaum dan agama dan tidak membuat teguran secara terbuka. Setiap kenyataan yang dikeluarkan tidak sepatutnya menyakitkan hati mana-mana kumpulan kaum dan penganut agama.



- (ii) menyampaikan mesej kepada pemimpin-pemimpin parti-parti politik supaya mengingatkan dan memberikan kesedaran kepada ahli-ahli parti agar sentiasa mengukuhkan perpaduan, terutama dalam persekitaran domestik dan luaran yang amat mencabar pada masa ini.
- (iii) menghormati antara satu sama lain apabila memberi sebarang pendapat dan pandangan dan tidak melampaui batasan dengan menggunakan bahasa yang kesat ketika menyentuh isu kaum dan agama. Walaupun wujud ideologi politik dan pandangan yang berbeza, masing-masing perlu kekal menghormati dan menghargai satu sama lain seperti kebiasaan dan meneutralkan politik kebencian.
- (iv) Melalui tindakan mahkamah dimana ahli politik yang sengaja menimbulkan sensitiviti kaum dan agama sehingga menimbulkan kebencian, kebimbangan dan kegusaran rakyat akan didakwa di mahkamah di bawah undang-undang yang sedang berkuat kuasa. Antaranya Akta Hasutan 1948 [Akta 15], Kanun Keseksaan [Akta 574] dan Akta Komunikasi dan Multimedia 1998 [Akta 588] digunakan untuk mengambil tindakan ke atas pihak yang didapati telah membangkitkan isu-isu sensitif melibatkan agama, kaum dan Institusi Diraja.
- (v) cadangan penubuhan Suruhanjaya Keharmonian dan Rekonsiliasi Nasional iaitu suatu suruhanjaya bebas bagi menangani isu-isu perkauman dan agama sedang dipertimbangkan oleh Kerajaan melalui RUU Suruhanjaya Keharmonian dan Rekonsiliasi Nasional (*National Harmony and Reconciliation Commission Bill*). PERPADUAN telah membuat beberapa pindaan terhadap draf sedia ada yang telah disediakan oleh MKPN pada tahun 2014 dan kini sedang mengkaji kewujudan model lain-lain suruhanjaya serta skop bidang kuasanya di beberapa negara luar untuk melihat kesesuaiannya di Malaysia. Dengan adanya suruhanjaya ini kelak, usaha-usaha yang lebih konkrit, holistik dan secara bersepadu dapat dilaksanakan bagi membina bangsa Malaysia yang lebih bersatu padu, adil dan saksama tanpa sebarang diskriminasi dan jenayah kebencian sebagaimana yang dihasratkan oleh barisan

pemimpin dan rakyat negara ini demi memelihara keamanan negara dan keharmonian masyarakat.

Kerajaan yakin dan percaya bahawa proses membina negara dan memupuk perpaduan nasional ke arah keharmonian negara sememangnya merupakan satu perjuangan berterusan yang memerlukan usaha-usaha dinamik bagi membuka minda dan sikap rakyat untuk meraikan dan menghargai kepelbagaian yang wujud. Usaha memupuk persefahaman dan perpaduan dalam kepelbagaian (*unity in diversity*) ini memerlukan penyertaan dan sumbangan dari semua pihak, terutamanya ahli-ahli politik, aktivis-aktivis masyarakat, pemimpin-pemimpin masyarakat, badan bukan kerajaan (NGO) dan sektor swasta.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATO' SERI DR. AHMAD ZAHID BIN HAMIDI  
[ BAGAN DATUK ]**

**TARIKH : 19 NOVEMBER 2019 (SELASA)**

**SOALAN NO. 24**

Minta **MENTERI HAL EHWAL EKONOMI** menyatakan berapakah jumlah pemilikan ekuiti korporat Bumiputera sehingga kini dan apakah langkah yang dilakukan oleh pihak Kementerian untuk meningkatkan jumlah pegangan ekuiti di kalangan Bumiputera.

**JAWAPAN**

Tuan Yang di-Pertua,

1. Untuk makluman Ahli Yang Berhormat, dalam konteks pemilikan ekuiti korporat Bumiputera, Kerajaan telah menetapkan sasaran sekurang-kurangnya 30% pemilikan ekuiti korporat Bumiputera di peringkat nasional. Tahap pencapaian pemilikan ekuiti Bumiputera berasaskan nilai tara (par value) dari tahun 2011 sehingga 2015 adalah seperti berikut:

<b>Tahun</b>	<b>2011</b>	<b>2012</b>	<b>2013</b>	<b>2014</b>	<b>2015</b>
Pemilikan ekuiti Bumiputera (%)	23	18	17	17	16

*Sumber: Unit Perancang Ekonomi, Jabatan Perdana Menteri dan Kementerian Hal Ehwal Ekonomi*

2. Menyedari sasaran bagi mencapai sekurang-kurangnya 30% pemilikan ekuiti Bumiputera yang masih rendah, dalam tempoh akhir RMKe-11, 2018-2020, Kerajaan memberi penekanan untuk menggalakkan lebih banyak penyertaan Bumiputera dan institusi pelaburan Bumiputera, syarikat milik Kerajaan (SOE) serta agensi amanah Bumiputera dalam pelaburan strategik dengan pulangan yang lebih tinggi ke arah mencapai sasaran yang ditetapkan.

3. Di bawah strategi ini, institusi pelaburan Bumiputera seperti EKUINAS dan VentureTECH akan terus meneroka dan melabur dalam syarikat yang mempunyai pertumbuhan tinggi dan berpotensi termasuk dalam sektor industri halal dengan kerjasama pihak berkepentingan yang berkaitan. Di samping itu, inisiatif untuk menggalakkan syarikat Bumiputera yang berpotensi untuk disenaraikan di Bursa Malaysia akan diteruskan.

4. Selain itu, SOE yang terdiri daripada syarikat berkaitan Kerajaan (GLC), syarikat berkaitan pelaburan Kerajaan (GLIC) serta badan-badan berkanun Kerajaan yang lain akan terus melabur dalam syarikat yang berkembang pesat dan tersenarai di Bursa Malaysia bagi memperolehi kawalan yang berkesan dalam syarikat berkenaan.

5. Agensi amanah Bumiputera seperti PNB akan terus melabur dalam instrumen yang dapat memberi pulangan yang tinggi serta meningkatkan pelaburan dalam aset persendirian dan global untuk menjana pulangan yang mampan dan berdaya saing kepada pemegang saham, khususnya Bumiputera. Kerajaan yakin bahawa langkah-langkah ini akan dapat membantu meningkatkan pemilikan ekuiti korporat Bumiputera dalam sektor korporat untuk mencapai sasaran sekurang-kurangnya 30%.

6. Sementara itu, Wawasan Kemakmuran Bersama (WKB) 2030 yang telah dilancarkan pada 5 Oktober 2019 telah menetapkan matlamat dan sasaran yang jelas dan boleh diukur. Sebahagian besar daripada penekanan WKB adalah untuk menangani isu jurang ekonomi yang membelenggu rakyat Malaysia. Untuk mendepani isu ini, kumpulan yang paling terkesan dengan kewujudan jurang dalam ekonomi negara

perlu dikenal pasti. WKB telah menambah baik definisi serta sasaran ekonomi sedia ada secara lebih komprehensif, dan dalam hal ini keberhasilan Bumiputera bukan hanya diukur melalui pencapaian 30% dalam pemilikan ekuiti semata-mata.

7. Di bawah WKB, pelbagai inisiatif akan dilaksanakan untuk memastikan peningkatan penyertaan Bumiputera dalam perolehan Kerajaan, khususnya kontrak-kontrak bernilai dan berimpak tinggi. Selain itu, penekanan khusus akan diberikan kepada pewujudan pekerjaan berpendapatan tinggi untuk Bumiputera. Sektor swasta dan syarikat berkaitan kerajaan (GLC) perlu memainkan peranan yang penting dan proaktif dalam menjamin kesaksamaan keberhasilan Bumiputera sejajar dengan dasar, strategi dan inisiatif yang dibangunkan di bawah WKB. Langkah ini termasuk menambah baik dasar dan amalan dalam pengambilan pekerja dan perolehan sektor swasta supaya tidak wujud sebarang bentuk diskriminasi terhadap Bumiputera. Penetapan sasaran-sasaran baharu lain akan turut diambil kira seperti sasaran keberhasilan Bumiputera dalam aspek keusahawanan; latihan dan pendidikan; akses kepada dana modal untuk perniagaan; dan penyelidikan.

8. Bagi menggembeleng pelbagai usaha di bawah WKB, dasar, strategi dan inisiatif khusus sedang dirangka oleh Kerajaan dan dijadual akan dibentangkan dalam Rancangan Malaysia Kedua Belas (RMKe-12) pada tahun hadapan. Penjajaran WKB akan diteruskan dalam Rancangan Malaysia Ketiga Belas (RMKe-13).

9. Kerajaan yakin bahawa WKB bukan sahaja bertujuan untuk meningkatkan KDNK tetapi juga memberi keutamaan kepada kesejahteraan rakyat untuk mengecapi taraf hidup wajar atau "*decent standard of living*" pada tahun 2030.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KEDUA  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB DATO' TAKIYUDDIN BIN HASSAN  
[KOTA BHARU]**

**TARIKH : 19 NOVEMBER 2019 (SELASA)**

**SOALAN**

Minta **PERDANA MENTERI** menyatakan apakah kriteria yang ditetapkan oleh Jabatan Peguam Negara untuk proses pelantikan Pendakwa Raya Kanan (*Senior DPP*) di jabatan berkenaan.

**JAWAPAN: YB TUAN MOHAMED HANIPA BIN MAIDIN**

**TIMBALAN MENTERI DI JABATAN PERDANA MENTERI**

Tuan Yang di-Pertua,

Subseksyen 376(3) Kanun Tatacara Jenayah [*Akta 593*] memperuntukkan kuasa Pendakwa Raya untuk melantik seseorang yang layak dan sesuai sebagai Timbalan Pendakwa Raya ("TPR") dan Pendakwa Raya juga boleh menetapkan seseorang TPR itu sebagai Timbalan Pendakwa Raya Kanan ("TPR Kanan"). Kriteria utama bagi pelantikan TPR iaitu "orang yang layak dan sesuai" turut terpakai bagi penetapan seseorang TPR Kanan. Hasrat Parlimen dalam menggubal peruntukan ini bertujuan untuk memperkukuh kedudukan Jabatan Peguam Negara dengan memberi kuasa kepada Pendakwa Raya untuk menetapkan seseorang pekhidmat awam yang kanan, berpengalaman dan pakar dalam menjalankan perbicaraan atau rayuan bagi kes-kes yang melibatkan kepentingan awam sebagai TPR Kanan.

Sekian, terima kasih.

**PEMBERITAHUAN PERTANYAAN**  
**MESYUARAT KETIGA, PENGGAL KEDUA,**  
**PARLIMEN KEEMPAT BELASDEWAN RAKYAT**

**PERTANYAAN : LISAN**

**DARIPADA : DATO' SERI HISHAMMUDDIN BIN TUN HUSSEIN**  
**[ SEMBRONG ]**

**TARIKH : 19 NOVEMBER 2019**

**SOALAN**

**DATO' SERI HISHAMMUDDIN BIN TUN HUSSEIN [SEMBRONG]** minta **PERDANA MENTERI** menyatakan apakah kesan jangka masa panjang yang dianggarkan oleh Kerajaan sekiranya skim lantikan kontrak baharu akan menggantikan skim tetap dan berpencen bermula tahun 2020.

**JAWAPAN: YB TUAN MOHAMED HANIPA BIN MAIDIN**  
**TIMBALAN MENTERI DI JABATAN PERDANA MENTERI**

Tuan Yang di-Pertua,

Untuk makluman Ahli Yang Berhormat, Kerajaan sedang berusaha untuk menambah baik Skim Perkhidmatan Awam bagi menjamin kebajikan anggota-anggota perkhidmatan awam di bawah **Kajian Pembaharuan Perkhidmatan Awam**, yang antara lain meliputi aspek perkhidmatan, kemajuan kerjaya, saraan, pasca perkhidmatan dan kemudahan yang disediakan kepada penjawat awam. Cadangan melaksanakan Skim Lantikan Kontrak bagi menggantikan Skim Lantikan Tetap dan Berpencen dalam perkhidmatan awam **masih di peringkat kajian** dan Kerajaan belum membuat keputusan muktamad berhubung cadangan tersebut.

**PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KEDUA  
PARLIMEN KE-EMPAT BELAS**

**PERTANYAAN : LISAN**

**DARIPADA : DATO' DR. NORAINI AHMAD  
(PARIT SULONG)**

**TARIKH : 19 NOVEMBER 2019 (SELASA)**

**SOALAN**

Minta **MENTERI PENGANGKUTAN** menyatakan sejauh manakah penilaian pihak Kementerian terhadap peningkatan jumlah motosikal di jalan raya susulan cadangan pelaksanaan perkhidmatan e-hailing motosikal atau Gojek di negara ini dan apakah bentuk kajian yang telah dibuat bagi memastikan keselamatan pengguna terjamin dan mengurangkan kes kemalangan jalan raya.

**JAWAPAN**

Yang di-Pertua,

1. Untuk makluman Yang Berhormat, Jemaah Menteri dalam mesyuaratnya pada 1 November 2019 telah bersetuju supaya syarikat perniagaan pengantaraan yang akan menyediakan perkhidmatan kenderaan perkhidmatan awam dan kenderaan barangan menggunakan motosikal (*bike-hailing*) dikawal selia melalui kaedah/peraturan pelesenan di bawah Akta Pengangkutan Jalan 1987 [Akta 333], Akta Lembaga Pelesenan Kenderaan Perdagangan [Akta 334] dan Akta Pengangkutan Awam Darat 2010 [Akta 715].

2. Perkhidmatan *bike-hailing* ini akan dikenakan syarat-syarat yang setara seperti mana telah ditetapkan ke atas perkhidmatan *e-hailing* (iaitu merangkumi syarat-syarat ke atas syarikat perniagaan pengantaraan, pemandu, pengoperasian perkhidmatan dan kenderaan).



3. Bagi mengawal selia perkhidmatan ini, Kementerian Pengangkutan pada masa ini sedang dalam proses membangunkan rangka perundangan dan syarat-syarat perkhidmatan *bike-hailing* (iaitu satu aktiviti yang menyediakan perkhidmatan pengangkutan awam dan barangan menggunakan motosikal).
4. Memandangkan proses pindaan undang-undang akan mengambil masa kerana termasuk memerlukan pembentangan dan kelulusan di Parlimen, Kerajaan telah bersetuju supaya syarikat perniagaan pengantaraan yang berminat menyediakan perkhidmatan *bike-hailing* ini dibenarkan melaksanakan proses rintis atau Proof of Concept (POC).
5. Di sepanjang tempoh POC ini, pihak syarikat perniagaan pengantaraan boleh membuat persiapan dan pengujian pelaksanaan perkhidmatan *bike-hailing*. POC ini juga akan turut membolehkan pihak Kerajaan dan syarikat perniagaan pengantaraan untuk mengumpul data, menilai tahap permintaan, menilai tahap penerimaan dan lain-lain keperluan operasi berhubung perkhidmatan *bike-hailing* ini.
6. POC ini akan bermula mulai Januari 2020. Tempoh POC pula akan ditetapkan selama enam bulan. Oleh yang demikian, Kementerian tiada data mengenai jumlah motosikal di jalan raya susulan daripada keputusan ini. Data akan diperolehi sebaik sahaja POC dijalankan.
7. Kajian mengenai keselamatan jalan raya dilaksanakan secara berterusan oleh Kementerian dan Agensi-agensi yang berkaitan. Namun, kajian utama mengenai kesan perkhidmatan *bike-hailing* selepas Kerajaan meluluskan perkhidmatan ini belum dijalankan memandangkan POC akan bermula mulai Jan 2020. Walau bagaimanapun, Kerajaan membenarkan pengendali dan syarikat perniagaan pengantaraan membuat pengujian pelaksanaan perkhidmatan *bike-hailing* melalui kaedah POC dengan syarat-syarat tertentu bagi tujuan pengumpulan data dan mengukur tahap penerimaan dan keselamatan terhadap perkhidmatan *bike-hailing* ini. Maklumat-maklumat ini akan digunakan semasa memperincikan peraturan-peraturan (pindaan undang-undang) yang akan dibangunkan dan dilaksanakan selepas tempoh POC tamat.

Sekian, terima kasih.

**PEMBERITAHUAN PERTANYAAN LISAN DEWAN RAKYAT**  
**MESYUARAT KETIGA PENGGAL KEDUA,**  
**PARLIMEN KEEMPAT BELAS**

---

**PERTANYAAN : LISAN**

**DARIPADA : YB DATUK SERI SARVANAN A/L  
MURUGAN [TAPAH]**

**TARIKH : 19 NOVEMBER 2019**

**SOALAN**

Minta **MENTERI SUMBER MANUSIA** menjelaskan adakah:

- (a) peningkatan gaji minimum ini adalah selaras dengan situasi ekonomi semasa negara dan bersetuju bahawa sebarang peningkatan gaji yang drastik bakal menimbulkan masalah lain kepada industri lain kepada industri yang juga boleh menggugat daya saing negara.
- (b) penyediaan peluang pekerjaan kini telah mencapai sasaran kerajaan Pakatan Harapan.

**JAWAPAN**

Tuan Yang di-Pertua,

1. Peningkatan kadar kenaikan gaji minimum adalah selaras dengan situasi ekonomi semasa negara. Ini kerana Kerajaan membuat keputusan setelah mengambil kira rasional-rasional seperti berikut:

- (i) Kerajaan ingin menyeragamkan kadar gaji minimum seluruh negara terlebih dahulu seperti yang dijanjikan dalam 10 janji Manifesto Kerajaan Pakatan Harapan dan susulan daripada itu barulah Kerajaan akan menaikkan gaji minimum secara berperingkat sehingga mencapai RM1,500 dalam tempoh satu penggal pemerintahan;
- (ii) Bagi mengurangkan peningkatan kos operasi kepada majikan terutama Perusahaan Kecil dan Sederhana (PKS). Peningkatan kadar gaji minimum yang mendadak akan meningkatkan kos operasi majikan terutama dari aspek caruman KWSP, PERKESO serta pembayaran kerja lebih masa, kerja pada cuti umum dan hari rehat. Malah, boleh menjejaskan pertumbuhan peluang pekerjaan baharu;
- (iii) Penetapan gaji minimum adalah gaji lantai dan tafsiran gaji minimum adalah gaji pokok. Pekerja/ kesatuan sekerja dan majikan dibenarkan berunding bagi menetapkan faedah-faedah lain yang dirasakan lebih baik daripada kadar gaji minimum;
- (iv) Pendapatan Garis Kemiskinan (PGK) yang lebih tinggi di Sabah, Sarawak dan Wilayah Persekutuan Labuan disebabkan kos sara hidup yang lebih tinggi berbanding Semenanjung Malaysia;

## SOALAN NO : 28

- (v) Untuk merapatkan jurang sosio-ekonomi yang bertujuan bagi memastikan keseimbangan ekonomi dapat dilaksanakan selain menstrukturkan semula ekonomi terutama di Sabah, Sarawak dan Wilayah Persekutuan Labuan;
  - (vi) Kadar munasabah dan tidak membebankan 98.5% majikan yang terdiri daripada sektor Perusahaan Kecil dan Sederhana (PKS) daripada keseluruhan ekonomi negara. Selain itu, perlu diambil kira ekonomi negara berkembang pada kadar yang lebih perlahan iaitu hanya 4.5% pada suku kedua tahun 2018 berbanding 5.4% pada suku pertama tahun 2018; dan
  - (vii) Melindungi daya saing negara yang mana kenaikan kadar gaji minimum yang terlalu tinggi dikhuatiri akan memberi kesan kepada kemasukan pelabur asing. Kerajaan juga perlu memastikan pelabur sedia ada terus kekal melabur di Malaysia. Pelaburan Langsung Asing (FDI) mencatatkan aliran masuk bersih yang lebih rendah sebanyak RM2.8 bilion pada suku kedua, 2018 berbanding RM12.0 bilion pada suku pertama, 2018.
2. Sekiranya kadar gaji minimum ditetapkan terlalu tinggi secara mendadak dikhuatiri akan menyebabkan keadaan seperti berikut:
- (i) majikan-majikan akan menghadapi kesukaran untuk survival dalam perniagaan akibat menampung pertambahan kos operasi perniagaan yang meningkat secara mendadak;
  - (ii) penutupan operasi oleh majikan kerana tidak mampu untuk meneruskan kelangsungan akibat menanggung kos operasi yang tinggi;
  - (iii) kehilangan pekerjaan yang bakal menimbulkan masalah pengangguran dan masalah sosial yang lain; dan

## **SOALAN NO : 28**

- (iv) akan membantutkan perkembangan Perusahaan Kecil dan Sederhana (PKS) yang baharu dalam struktur ekonomi negara.

Tuan Yang di-Pertua,

3. Berkenaan dengan isu penyediaan peluang pekerjaan seperti yang dijanjikan oleh Kerajaan Pakatan Harapan, berdasarkan statistik guna tenaga oleh Jabatan Perangkaan Malaysia (DOSM), jumlah peluang pekerjaan bagi tahun 2018 adalah sebanyak 300,000. Jumlah ini menunjukkan Kerajaan mampu menghasilkan 1 juta peluang pekerjaan dalam masa 5 tahun seperti yang disasarkan oleh Kerajaan Pakatan Harapan dengan anggaran 200,000 peluang pekerjaan setahun.

4. Kesimpulannya dalam membuat sebarang keputusan dasar perburuhan, Kerajaan sentiasa melihat semua aspek secara teliti agar dasar yang diputuskan kelak benar-benar memberi manfaat kepada rakyat secara keseluruhannya.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB DATO' SRI ISMAIL SABRI BIN YAAKOB  
[BERA]**

**TARIKH : 19 NOVEMBER 2019 (SELASA)**

**SOALAN**

Minta **MENTERI HAL EHWAL EKONOMI** menyatakan berapa jumlah aset, pelaburan serta ekuiti syarikat di bawah agensi dan milikan Kerajaan yang telah dijual kepada syarikat milikan asing tempatan. Perincikan.

**JAWAPAN**

Tuan Yang di-Pertua,

1. Untuk makluman Yang Berhormat, Penjualan (atau lebih tepat, “pelupusan”) aset adalah aktiviti perniagaan yang lazim dilakukan oleh Syarikat-syarikat Pelaburan Berkaitan Kerajaan (GLIC) seperti Khazanah Nasional Berhad (Khazanah), Permodalan Nasional Berhad (PNB) dan Kumpulan Wang Simpanan Pekerja (KWSP).

2. Penjualan atau lebih tepat pelupusan aset adalah aktiviti perniagaan yang lazim dilakukan oleh Khazanah sebagai sebuah dana pelaburan ataupun *investment fund* dan bukanlah suatu perkara yang baharu. Ia juga adalah aktiviti perniagaan yang dilakukan oleh dana pelaburan yang lain. Memandangkan Khazanah tidak menerima

sebarang suntikan dana daripada sumber luar untuk pelaburannya, hasil pelupusan merupakan sumber utama untuk pelaburan baharu.

3. Ini berbeza dengan KWSP dan PNB. Selain daripada hasil pelupusan, KWSP menerima dana daripada caruman pekerja secara berkala manakala PNB menerima dana daripada pelabur dalam unit amanahnya untuk aktiviti pelaburan mereka.

4. Pelupusan aset dipertimbangkan sebaik sahaja sesuatu pelaburan telah mencapai sasaran kewangan dan strategik yang telah ditetapkan. Sebagai contoh, pelaburan tersebut telah mencapai keuntungan yang disasarkan. Pelupusan sesuatu aset juga bergantung kepada masa dan kekuatan pasaran serta ketersediaan ataupun *availability*, *quality* dan *credibility* pembeli. Prinsip ini digunakan untuk pelupusan sebelum ini dan sebarang pelupusan yang akan dibuat pada masa hadapan.

5. Senarai pelupusan dalam syarikat-syarikat tersenarai awam terpilih berdomisil luar negara yang telah dilaksanakan oleh Khazanah antara bulan Mei 2018 hingga Ogos 2019 adalah:

- i. BDO Unibank Inc, pelupusan penuh bernilai RM1,559 juta;
- ii. Infosys Limited, pelupusan penuh bernilai RM201 juta;
- iii. PT Charoen Pokphand Indonesia, pelupusan penuh bernilai RM196 juta;
- iv. Titan Industries Limited, pelupusan separa bernilai RM89 juta;
- v. Alibaba Group Holdings, pelupusan separa bernilai RM2,234 juta;
- vi. Farfetch.com Limited, pelupusan penuh bernilai RM771 juta; dan
- vii. SEA Limited, pelupusan penuh bernilai RM612 juta.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KEDUA  
PARLIMEN KEEMPAT BELAS (2019)**

---

**PERTANYAAN : LISAN**

**DARIPADA : YB DATO' SERI HAJI MUKHRIZ BIN TUN DR.  
MAHATHIR [JERLUN]**

**TARIKH : 19 NOVEMBER 2019 (SELASA)**

**SOALAN**

Minta **PERDANA MENTERI** menyatakan perkembangan mengenai pelaksanaan TVET di institusi pendidikan Islam, khususnya Sekolah Agama Rakyat, Maahad Tahfiz dan Pondok:

- a) sudahkah kurikulum atau modul TVET disiapkan dan kaedah pelaksanaan pengajaran TVET di institusi tersebut; dan
- b) tenaga pengajar TVET di insitusi berkenaan, adakah dari kalangan guru sedia ada atau Kementerian menyediakan tenaga pengajar vokasional.



**JAWAPAN :**     **(YB DATUK SERI DR. MUJAHID BIN YUSOF,  
MENTERI DI JABATAN PERDANA MENTERI)**

Yang di-Pertua,

**a)**

1. Untuk makluman Yang Berhormat, pembelajaran kemahiran atau TVET di sekolah pondok dan institusi tahfiz adalah mengguna pakai modul dan silibus sedia ada di institusi penyedia latihan kemahiran seperti GIATMARA, Kolej Politeknik dan Kolej Komuniti, Kementerian Pendidikan Malaysia.

2. Pelaksanaan pembelajaran TVET dibuat secara kerjasama dengan institusi penyedia latihan kemahiran yang berhampiran dan sesuai dengan keperluan kursus yang ingin diambil oleh pihak institusi tahfiz dan pondok. Ia dilaksanakan dalam dua bentuk iaitu sama ada kursus kemahiran dilaksanakan di institusi tahfiz dan pondok atau dilaksanakan di institusi penyedia latihan kemahiran. Sehingga kini Jabatan Kemajuan Islam Malaysia (JAKIM) telah menjalinkan kerjasama dengan 63 Kolej Komuniti KPM di seluruh negara yang menawarkan 320 kursus kemahiran kepada institusi tahfiz berdaftar yang terpilih.

**b)**

3. Kursus kemahiran atau TVET yang dilaksanakan oleh penyedia latihan kemahiran adalah melibatkan tenaga pengajar bertauliah dan berkemahiran sesuai dengan kursus yang diambil oleh pelajar, khasnya tenaga pengajar dari Majlis Amanah Rakyat (MARA) dan Kementerian Pendidikan Malaysia.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATUK AARON AGO DAGANG (KANOWIT)**

**TARIKH : 19 NOVEMBER 2019**

**SOALAN**

**DATUK AARON ARO DAGANG (KANOWIT)** minta **PERDANA MENTERI** menyatakan jumlah penerima bantuan Kerajaan untuk rakyat miskin di bawah skim eKasih, orang tua, OKU dan jumlah peruntukan untuk tujuan tersebut mengikut negeri.

**JAWAPAN: YB TUAN MOHAMED HANIPA BIN MAIDIN**  
**TIMBALAN MENTERI DI JABATAN PERDANA MENTERI**

Yang di-Pertua,

Kerajaan telah membangunkan Sistem eKasih sebagai satu pangkalan data kemiskinan nasional yang bertujuan untuk mendaftarkan golongan miskin di Malaysia dan mengklasifikasikan golongan miskin sama ada Miskin Tegar atau Miskin berdasarkan Pendapatan Garis Kemiskinan (PGK) semasa melalui proses verifikasi di lapangan. Kriteria penetapan kategori kemiskinan adalah bergantung kepada jumlah pendapatan perkapita isi rumah dan berasaskan kepada formula perkiraan yang telah disediakan oleh pihak Kementerian Hal Ehwal Ekonomi dan juga Jabatan Perangkaan Malaysia melalui Penyiasatan Pendapatan Isi Rumah 2016 ataupun *Household Income Survey* 2016. Terdapat tiga kategori status kemiskinan dalam sistem eKasih iaitu Miskin Tegar, Miskin dan Terkeluar.

**SOALAN NO : 31**

Berdasarkan rekod eKasih, sehingga 30 September 2019 sebanyak 2,404,833 bilangan bantuan dengan jumlah sebanyak RM3.5 bilion telah disalurkan kepada isi rumah eKasih berstatus Miskin Tegar dan Miskin di seluruh negara untuk program dan bantuan kesejahteraan rakyat.

Bilangan bantuan dan nilai bantuan bagi Miskin Tegar dan Miskin sehingga 30 September 2019 mengikut negeri adalah seperti di Jadual 1 manakala bilangan bantuan OKU dan Bantuan Orang Tua (BOT) di dalam Sistem eKasih sehingga 30 September 2019 adalah seperti di Jadual 2.

**Jadual 1:** Bilangan dan Nilai Bantuan Miskin Tegar dan Miskin Sehingga 30 September 2019

<b>Negeri</b>	<b>Bilangan Bantuan</b>	<b>Nilai Bantuan (RM)</b>
Johor	55,294	92,910,809
Kedah	41,953	59,023,212
Kelantan	454,727	519,081,510
Melaka	13,074	20,009,235
Negeri Sembilan	35,277	52,282,143
Pahang	76,160	112,659,216
Perak	46,977	61,819,468
Perlis	31,904	49,481,531
Pulau Pinang	90,462	112,230,444
Sabah	551,992	894,034,331
Sarawak	704,291	1,072,306,737
Selangor	125,622	160,607,449
Terengganu	122,343	167,421,711
WP Kuala Lumpur	43,826	60,510,311
WP Labuan	10,913	19,494,409
WP Putrajaya	18	19,100
<b>Jumlah</b>	<b>2,404,833</b>	<b>3,453,891,616</b>

**SOALAN NO : 31**

**Jadual 2 :** *Bilangan Bantuan OKU dan Bantuan Orang Tua (BOT) Dalam Sistem eKasih Sehingga 30 September 2019*

Negeri	Bantuan OKU		BOT		Jumlah Keseluruhan	
	Bilangan Bantuan	Nilai Bantuan (RM)	Bilangan Bantuan	Nilai Bantuan (RM)	Bilangan Bantuan	Nilai Bantuan (RM)
Johor	376	954,440	571	1,900,870	947	2,855,310
Kedah	352	945,240	369	1,117,148	721	2,062,388
Kelantan	1,718	4,123,010	1,817	5,700,266	3,535	9,823,276
Melaka	98	261,260	163	582,960	261	844,220
Negeri Sembilan	220	565,980	416	1,402,620	636	1,968,600
Pahang	425	1,119,950	842	2,767,990	1,267	3,887,940
Perak	286	701,400	234	801,240	520	1,502,640
Perlis	198	479,945	126	380,730	324	860,675
Pulau Pinang	537	1,567,810	1,044	3,641,210	1,581	5,209,020
Sabah	951	2,626,231	3,804	12,728,626	4,755	15,354,857
Sarawak	1,661	2,999,145	6,037	20,332,373	7,698	23,331,518
Selangor	1,091	2,473,750	970	3,200,310	2,061	5,674,060
Terengganu	366	986,330	472	1,485,670	838	2,472,000
WP Kuala Lumpur	304	832,340	260	849,520	564	1,681,860
WP Labuan	32	75,900	79	261,000	111	336,900
WP Putrajaya	3	11,400	-	-	3	11,400
<b>Jumlah</b>	<b>8,618</b>	<b>20,724,131</b>	<b>17,204</b>	<b>57,152,533</b>	<b>25,822</b>	<b>77,876,664</b>

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KEDUA  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB TUAN YAMANI HAFEZ BIN MUSA  
[ SIPITANG]**

**TARIKH : 19 NOVEMBER 2019 (SELASA)**

**SOALAN**

Minta **PERDANA MENTERI** menyatakan apakah langkah jangka panjang yang diambil Kerajaan untuk menangani isu banjir pendatang asing di Sabah.

**JAWAPAN**

Tuan Yang Di-Pertua,

1. Kerajaan melalui usaha yang dijalankan oleh agensi-agensi yang berkaitan telah melaksanakan pelbagai usaha intervensi bagi mengatasi masalah banjir pendatang asing tanpa izin (PATI) di seluruh negara khususnya di negeri Sabah. Operasi tangkapan dan pengusiran juga amat giat dijalankan. Sejak tahun 1990 hingga 30 September 2019, sebanyak 586,700 orang PATI telah diusir keluar dari Sabah.

2. Walau bagaimanapun, kerajaan sedar bahawa masalah PATI ini tidak mampu dibendung sepenuhnya melalui kaedah tangkap dan usir semata-mata. Oleh yang demikian, Kerajaan sentiasa berusaha memperketatkan kawalan sempadan daripada dibolosi oleh sindiket penyeludupan PATI ke Sabah. Kerajaan juga sentiasa merancang dan melaksanakan langkah-langkah baharu yang boleh mempercepatkan

proses pengusiran PATI ke negara asal khususnya Filipina, terutamanya dengan mengadakan hubungan dan rundingan dengan kerajaan Filipina.

3. Selain PATI, Sabah juga dibanjiri oleh golongan pendatang asing yang merupakan keturunan pelarian Filipina. Dalam menangani banjirian golongan pendatang asing ini, ianya perlu mengambil kira faktor geopolitik negara-negara jiran terutamanya Filipina dan Indonesia yang mana rakyat mereka merupakan imigran terbesar yang membanjiri Sabah. Justeru itu, Kerajaan memberi sokongan penuh terhadap proses damai di selatan Filipina supaya kesan terhadap elemen *human security* tidak menular ke Malaysia khususnya di Sabah. Kerajaan juga melihat bahawa perkembangan terbaharu seperti pembentukan *Bangsamoro Autonomous Region in Muslim Mindanao* (BARMM) di selatan Filipina merupakan peluang terbaik untuk mengurangkan jumlah kemasukan PATI dari negara jiran ini ke negeri Sabah.

4. Selain daripada langkah-langkah intervensi yang sedang dilaksanakan, Kerajaan berpandangan bahawa sokongan dan usaha membantu memakmurkan kawasan negara sempadan seperti di selatan Filipina mampu memberi impak positif dalam usaha membendung banjirian warga asing di negeri Sabah.

5. Perlu ditegaskan juga bahawa tindakan membendung masalah banjirian pendatang asing bukanlah terletak di bahu Kerajaan semata-mata, malah ianya memerlukan penglibatan dan kerjasama pelbagai pihak termasuk orang awam supaya tidak bersekongkol dalam melindungi atau menggaji PATI untuk bekerja.

Sekian, terima kasih.